



**pngelectionprinting.com**



POSTERS BANNERS CARDS A-FRAMES FLYERS CAR STICKERS CORFLUTE SIGNS

# K12.9 bilien bilong 2017

**GAVMAN** i skelim K12.9 bilien long ol wan wan namba wan sekta bilong kantri we gavman i save givim mani long ranim kantri.

Dispela mani mak em i kam aninit long Nesenel Baset bilong yia 2017. Gavman i katim daun mani bilong planti dipatmen tasol ol ki na namba wan praoriti eria bilong gavman i kisim inap mani long mekim wok long neks yia.

Tresera Patrick Pruaitch i tok gavman i katim K12,965. 4 milien o K12.9 bilien egensim K11,088.8 milien revenu mani em i kisim.

Gavman i bin kisim K9,182.2 milien (o K9.1 bilien) long takis mani o takis revenu, K1,045.3 milien (o K1.0 bilien) i kam long ol grent o helpim arapela kantri i givim long PNG, na K1,245.7 milien (o K1.2 bilien) i kam long ol arapela hap we gavman i save kisim mani.

Gavman i skelim dispela mani aninit long wan wan sekta. I gat 9-pela sekta we gavman i skelim dispela mani.

Provinsal Sekta, Edministresen Sekta, Lo na Jastis Sekta, Edukesen Sekta na Helt Sekta i kisim moa mani.

Mista Pruaitch i tokaut long Palamen long Tunde long dispela wik olsem dispela em ol namba wan praoriti eria bilong gavman.

Mista Pruaitch i tok prais bilong ol komoditi olsem oil na ges i no bin stap gut long intenesenel maket, na dispela i lukim Nesenel Baset bilong neks yia i pundaun i kam daun long K12.9 bilien.

Long las yia, Nesenel Baset bilong dispela yia i bin sanap long mani mak klostu long K14 bilien, na Nesenel Baset bilong yia 2014 i bin sanap long K16 bilien.

Tasol Mista Pruaitch i tok

pundaun bilong ol komoditi we PNG i save salim na kisim mani i lukim gavman i skelim:

Provinsal Sekta i kisim K3, 605.7 milien;

Edministresen Sekta i kisim K2, 732.3 milien;

Helt Sekta i kisim K1, 221.5 milien;

Ikonomik Sekta K398.0 milien;

Edukesen Sekta i kisim 1, 162.5 milien;

Transpot Sekta i kisim K897.2 milien;

Lo na Jastis Sekta i kisim K1, 124.5 milien;

Komyuniti na Kalsa Sekta i kisim K224.6 milien; na

Yutilitis Sekta i kisim 216.2 milien

**Moa palamen  
insait long  
pes 2 na 3...**

## Takis go antap long smuk na bia...



**BASET 2017: Treseri Minista Patrick Pruaitch na Nesenel Plening Minista Charles Abel wantaim ol Seketeri i wokabout go insait long semba bilong Palamen bihain long Baset Lokap long Tunde dispela wik. Poto Nicky Bernard**



**PROUDLY  
SUPPORTING THE  
FIFA U-20 WOMEN'S  
WORLD CUP 2016**



NATIONAL SUPPORTER

Call Toll Free on **180 3444**  
for more information.



# PALAMENNIUS - Baset

# Rot em i namba wan sevis

**GAVMAN i lukluk long kirapim ol rot netwok insait long kantri, Tresera Patrick Pruaitch i tok.**

Mista Pruaitch i tok lukluk bilong gavman long yia 2016 i bin stap long rot na bris bikos dispela tupela namba wan sevis i save opim rot long bringim arapela ol developmen na sevis.

Em i mekim dispela toktok taim em i tokaut long K897.2

milien transpot sekta i kisim long kirapim ol rot, bris, ples balus na ol bris long yia 2017.

“Wok bilong apgretim na kirapim ol bikpela nesenel rot bilong kantri em i namba wan prairiti bilong gavman.

“Okuk Haiwe, ol rot bilong Lae Siti, Hagen Siti, Madang Taun rot, Kompiam-Baiyer rot, wantaim arapela ol rot projek insait long wan wan distrik na

provins bai kisim sapot bilong gavman.

“Tasol ol provinsal gavman i mas putim moa mani long ol liklik han rot ol liklik provinsal rot insait long wan wan provins.

“Asian Development Bank (ADB) i wok long sapotim na helpim gavman long apgretim Okuk (Hailans) Haiwe.

“Gavman bilong Saina i helpim yumi long apgretim na mekim rot bilong Lae-Nadzab

rot i go bikpela na kamap 4-len haiwe long joinim Okuk Haiwe,” Mista Pruaitch i tok.

Em i tok sip bris long Lae na Pot Mosbi tu i lukim bikpela senis i kamap bikos gavman i putim moa mani i go insait.

“Aninit long CADIP program, ol ples balus bilong kantri i wok long lukim gutpela senis i kamap. Kagamuga na Nadzab ples balus bai kisim helpim long gavman,” em i tok.

## Ol wan wan provins i kisim mani long ransim provins long neks yia olsem:

- Westen i kisim K137, 400, 000 milien;
- Galp i kisim K86, 041, 125 milien
- Sentral i kisim K145, 462, 431 milien
- Nesenel Kapital Distrik i kisim K172, 844, 000 milien
- Milen Be i kisim K152, 499, 347 milien
- Oro i kisim K89, 888, 330 milien
- Sauten Hailans i kisim K188, 677, 131 milien
- Enga i kisim K160, 845, 546 milien
- Westen Hailans i kisim K170, 808, 126 milien
- Simbu i kisim K188, 592, 276 milien
- Isten Hailans i kisim K238, 418, 882 milien
- Morobe i kisim K274, 027, 163 milien
- Madang i kisim K245, 657, 225 milien
- Sandaun i kisim K152, 054, 464 milien
- Is Sepik i kisim K222, 272, 468 milien
- Manus i kisim K58, 064, 569 milien
- Nu Ailan i kisim K98, 947, 277 milien
- Is Nu Briten i kisim K189, 293, 443
- West Nu Briten i kisim K112, 871, 527 milien
- Bogenvil i kisim K256, 576, 100 milien
- Hela i kisim K155, 088, 949 milien
- Jiwaka i kisim K109, 303, 202 milien

## Ol provins kisim K3.6 bilien

TOTAL namba bilong mani we ol wan wan provins i kisim long ranim provins neks yia i sanap olsem K3.6 bilien.

Tresera Patrick Pruaitch i tokaut long dispela long Palamennius long dispela wik Tunde tai em i tokaut long mani plen bilong ranim kantri long neks yia.

“Provinsal Sekta em i namba wan sekta bikos ol i save givim gavman sevis i go daun long ol pipel long wan wan ples na long

ol ruel eria,” Mista Pruaitch i tok.

Dispela mani mak we i go long ol provins o provinsal sekta em i bikpela mani we Gavman i skelim long dispela baset na givim i go long ol wan wan provins.

“Long yia 2017, Provinsal Sekta bai kisim K3, 605.7 milien. Dispela em i 27.2 pesen bilong total mani mak i stap long baset.

## Provins na Distrik kisim bikpela baset

GAVMAN i brukim moa long K3 bilien insait long 2017 baset i go long ol provins na distrik olsem bikpela plen bilong em long neks yia.

Gavman i skelim K3.605 bilien we ol mani bai go insait long wok bilong Provinsal Sapot Impuvmen Progrem (PSIP) na Distrik Sapot Impuvmen Program (DSIP). PSIP bai kisim mani mak long K220 milien na DSIP bai kisim K890 milien, ol Lokal Level Gavman bai kisim K32.2 milien na ol Wod Level bai kisim K61.8 milien.

Treseri Minista Patrick Pruaitch i tokaut long baset miting long Palamennius long dispela wik

olsem namba wan lukluk bilong gavman long dispela baset em long ol provins na distrik level.

Namba tu em gavman i lukluk long ol wok bilong edministresen o opis wok na bisnis bilong gavman.

Mista Pruaitch i tok insait long Edministresen sekta, gavman i brukim K2.732 bilien go long dispela eria we bikpela hap mani bai go long lukautim bikpela intenesenel miting bilong APEC o Esia Pasifik Yuropien Komuniti long neks yia.

Minista i tok mani mak long K250 milien bai go long APEC miting na K400 milien bai go long bikpela nesenel ileksen long neks yia. Antap long en em ol

arapela bikpela wok olsem supaenuesen fan bilong ol pablik sevis wokmanmeri na ol arapela kos olsem pinis pe bilong ol wokmanmeri na rent bilong ol gavman opis na dipatmen.

Eria bilong Helt bai kisim namba tri hap bilong dispela baset we mani mak i sanap long K1.221 bilion we i karapim fri helt kea na marasin saplai bilong olgeta haus sik na helt senta insait long kantri.

Minista i tok namba foa hap bilong baset bai go long en em long Edukesen eria we gavman i skelim mani mak long K1.152 bilien. Dispela em karamapim fri edukesen

na ol kos bilong ranim ol skul na wok bilong edukesen insait long kantri.

Lo na Oda i kisim namba 5 bikpela luksave long dispela baset wantaim K1.124 bilien baset.

Dispela baset i karamapiim nupela kot haus long Waigani we mak olsem K80 milien, ol haus bilong polis mak long K2 milien, polis modenaisesen program mak long K15 milien na Difens Fos ol projek bilong ol mak long K5 milien.

Mista Pruaitch i tokaut tu olsem Transpot sekta tu i kisim luksave long mani mak olsem K897.51 milien long dispela baset.

mekim mani. Ol bikpela hat taim nau em prais bilong ol gol na kopa, wel na ol mineral risos i no mekim gut mani long wol maket bikos wol prais i pundaun.

Ol dispela foapela takis eria em;

Takis long ol diwai i go long ovasis maket.

Gavman bai apim takis long prais bilong ol smok na bia

Takis long ol haus rent Apim takis long maining na risos sekta.

Mista Pruaitch i tokaut olsem gavman bai apim takis long ol smok na bia bikos dispela em wanpela eria we gavmani save tromoi bikpela mani long ol hevi we i save kamap long dispela samting.

Hevi bilong lo na oda bikos long ol spak pasin, hevi bilong marasin na

haus sik bikos ol manmeri kisim bagarap o sik nabaut, tromoi mani long edukesen na awanes bilong skulim ol manmeri long nogut bilong ol smok na spak pasin.

Minista Pruaitch i tok gavman i save olsem dispela senis bai i mekim ol manmeri go long arapela rot nabaut long kisim ol smok nogut o mekim ol kain kain bia nabaut we lo i tambu long en. Olsem na gavman bai kamapim wanpela tas fos grup bilong ol polis long wok klostu long holim na sasim ol lain ibrukim lo long mekim kain kain smok nogut na hom bru nabaut.

Gavman bai kisim takis nau long olgeta kain kain diwai ol kampani save katim na salim.

Dispela em bai olsem polisi we maski wanem kain diwai ol kampani i katim, gavman bai sasim takis long ol bikos ol saveman i tokaut olsem pastaim em gavman i no

spendisa o mani bilong yusim ol projek insait long provins.

Antap long en, K4, 63.2 milien bai go long Guds na Sevis Takis na Bukmeikas Tenova Takis.

Operesenal Ekspendisa bai karamapim mani bilong mekim ol edministresin wok, fanksenel wok, potnait mani bilong pablik sevan, potnait mani bilong ol tisa, liv mani bilong ol tisa, liv mani bilong ol pablik sevan na lokal level gavman (LLG) gren.

# Takis go antap long smok na bia

luksave long dispela olsem na hamas kantri i mekim long ol diwai i no stret long trupela prais bilong olgeta diwai i go aut long ovasis maket.

Dispela polisi tu bai helpim ol papagraun long ples long ol tu ken katim ol diwai na salim long mekim mani.

Em i tok gavman bai apim takis long ol eria bilong maining we ol save kolim edisenel profit takis (APT).

Dispela em wanpela mak bilong takis we i sanap olsem 30 pesen we olgeta maining bisnis long kantri bai baim na i no long oil na ges tasol husat i wok long baim takis tude.

Narapela takis bai gavmani mas mekim mani long en em long sait bilong ol haus.

Dispela takis bai mekim ol bikpela kampani i stat long wokim ol haus bilong ol wok manmeri na no ken tromoi bikpela takis long ol rent bilong ol wok manmeri long ol haus nabaut.



# Wasa Rice 200g Em Skel Ya

## GROWN FOR THE PEOPLE OF PNG



# Dinau bilong gavman bai go antap

TOTAL dinau mani gavman i kisim o mani mak pablik dinau bai sanap olsem K21, 623.3 milien o K21.6 bilien long pinis bilong yia 2017.

Tresera Patrick Pruaitch i tokaut long dispela long Tunde long dispela wik taim em i katim na skelim mani bilong 2017 Nesanel Baset.

"Gavman i glasing olsem total pablik dinau bai go antap long K21,



Tresera Patrick Pruaitch

623.3 milien long neks yia.

"Long yia 2016, dinau mak i sanap olsem K19, 784.7 milien o K19.7 bilien. Tasol long pinis bilong neks yia em bai go antap long K21.6 bilien," Mista Pruaitch i tok.

Em i tok aninit long Fiskal Risponsibiliti Ekt (FRA) 2006, balens bilong Gros Domestik Prodak (GDP) na dinau mani bai go daun long 28.8 pesen long yia 2017.

Bilong yia 2016 dis-

pela mak i sanap olsem 29.4 pesen. FRA i givim tok orait long larim dispela mak i stop long 30 pesen.

"Long pinis long yia 2016, dinau mani we gavman i kisim insait long PNG yet bai sanap olsem K13, 369.4 o K13.3 bilien," Mista Pruaitch i tok.

Bihain long yia 2017, mak bilong dinau mani gavman i kisim bai sanap olsem K6, 415.3 milien o

K6.4 bilien.

Mista Pruaitch i tok Gavman i tingting long kisim wanpela moa dinau gen long wanpela bikpela benk ol i kolim Credit Suisse.

"Dispela mani ba sapatim ol rot na infrastraksa projek long kantri long pinis bilong dispela yia na neks yia," em i tok.

Em i no tokaut long hamas gavman bai kisim long Credit Suisse.



PALAMEN NIUS

## Helt na Edukesen namba wan samting

GAVMAN bai no inap katim daun mani mak helt na edukesen sekta i save kisim, Tresera Patrick Pruaitch i tok.

Mista Pruaitch i tok edukesen sekta i kisim K1, 162.5 milien o K1.16 bilien.

Dispela mani mak i wankain olsem 8.7 pesen bilong total baset. Tasol em i katim daun 7.4 pesen taim yu lukluk long 2016 Saplimentari Baset, Mista Pruaitch i tok.

"Long dispela K1.16 bilien, K602.0 milien bai go long Tuisen Fi Fri (TFF) edukesen polisi bilong gavman.

"Em bai karamapim operesen bilong ol praimer skul, developim karikulum bilong ol tisa, baim nupela teks buk na arapela risos bilong tisa," em i tok.

Invesmen i go long edukesen sekta bai lukim nupela infrastraksa i kirap long ol yunivesiti, ol teknikel kolis, tisas kolis, na nasing kolis insait long kantri.

Helt sekta i kisim K1, 221.5 milien o K1.2 bilien. Dispela em i 9.2 pesen bilong total mani i stap long baset.

Baset alokesen bilong helt sekta i pundaun i kam daun long 20.5 pesen taim yu skelim wantaim mani helt sekta i bin kisim long 2016.

Mista Pruaitch i tok gavman i putim helt i go pas bikos em i wanpela namba wan prairiti eria bilong givim sevis i go long ol pipel.

# Gavman ejensi joinim dipatmen

SAMPELA Gavman ejensi we i save operet long ol yet bai bung wantaim ol arapela gavman dipatmen.

Gavman i joinim sampela ejensi i kamap wanpela tasol aninit long ol dipatmen we i save mekim wankain wok.

Aninit long 2017 Nesanel Baset, 15 gavman ejensi na opis bai no inap kisim fanding long nem bilong ol yet.

Ol dispela ejensi na opis i save kisim fanding o mani bilong ranim opis long wan wan yia long nem bilong ol yet tasol long dispela yia, ol bai no inap kisim mani long nem bilong ol yet.

Tresera Patrick Pruaitch i tok taim prais bilong ol komoditi olsem oil na ges i pundaun long intensenel maket, dispela i lukim gavman i no kisim moa mani long inapim baset bilong kain ol gavman ejensi we i save operet long ol yet.

Ol dispela ejensi em ol:

- Pesenel Sevis Komisin i joinim Dipatmen ov Pesenel Menesmen;
- Opis ov Turisim, Ats na Kalsa i joinim Turisim Promosen Atoriti;
- Dipatmen ov Implementesen na Rurel Developmen bai kam aninit long Dipatmen ov Nesanel Plening na Monitaring;

- Kostal Piseris Developmen Ejensi i joinim Nesanel Piseris Atoriti;
- Nesanel Ikonmik Fiskal Komisin i joinim Dipatmen ov Treseri;
- Nesanel AIDS Kaunsil i joinim Dipatmen ov Helt;
- Nesanel Kodinesen Opis ov Bogenvil Afeas (NCOBA) i joinim Dipatmen ov Praim Minista na NEC;
- Integretet Fainensal Menesmen Sistem i joinim ICT Divisen bilong Fainens Dipatmen;
- Nesanel Tripatait Konsaltetiv Kaunsil (NTCC) i joinim Dipatmen ov Leiba na Industrial Rilesen;
- Nesanel Nakotiks Bireu i joinim Dipatmen ov Jastis na Atoni Jeneral;
- Kakao Kokonas Industri i joinim Kokonas Industri Koperesen (KIK) na Kakao Bod;
- Opis ov Ebenaisesen i joinim Dipatmen ov Lens;
- Boda Developmen Atoriti i joinim Dipatmen ov Nesanel Plening na Monitaring;
- Dipatmen ov Pablik Entaprais i joinim Dipatmen ov Treseri; na
- PNG Sains Seketeriat i joinim Dipatmen ov Haia Edukesen,

Sains na Teknoloji. Sif Seketeri Isaac Lupari i bin tok gavman bai mekim dispela senis long sevim mani na larim mani i go long ol namba wan gavman dipatmen na pablik sekta.

Mista Lupari i tok ol dispela gavman ejensi i save mekim wankain wok olsem arapela ol gavman dipatmen.

"Em i gutpela mipela i

joinim ol na larim ol i kam aninit long wanpela dipatmen.

"Dispela bai helpim gavman long sevim mani na larim ol prairiti eria bilong gavman olsem helt, edukesen, lo na oda, infrastraksa na ikonmik developmen i kisim inap mani long mekim wok," em i tok.

## Siaman tok tenkyu long luksave

SIAMAN bilong Angore Wellhead Leadership Committee (AWLC), Hari John Akiye, i tok tenkyu long Minista Bilong Petroleum na Eneji, Nixon Duban, i makim maus bilong gavman na luksave long dispela nupela komiti.

Mista Akiye, husat i papagraun tru bilong Welhet B long Angore PDL 8 insait long PNG LNG Projek, i tok ol foapela siaman bilong foapela klen long Angore i kamapim dispela lidasip komiti bikos ol i lukim olsem i no gat wanpela lidasip i stap long ples.

Mista Akiye i tok AWLC bai wokbung wantaim gavman, projek developa ExxonMobil PNG Ltd, ol pipel long Angore komyuniti na wantaim arapela ol stekholda.

"Angore PDL 8 em i gat bikpela



Hari John Akiye, siaman bilong AWLC.

baundri o boda mak. Tasol ges bilong PDL 8 i stap long wanpela liklik ples ol i kolim Undupi.

"Undupi i stap long Hayapuga LLG insait long Tari-Pori ilektoret, tasol hap graun bilong Korobakopiago (Pureni blok) na Komo-Margarima (Komo na Awa Tangi blok) i kam insait long Angore PDL 8.

"Ol man i katim dispela boda mak i no katim gut. Mipela i gat tripela welhet tasol, i no planti. Na dispela olgeta welhet na ges risev i stap long liklik ples bilong mipela long Undupi.

"Long dispela as, mipela i kamapim dispela komiti long helpim ol pipel long ples, helpim gavman na helpim kampani wantaim projek.

"Sekyuriti bilong projek i stap gut, na mipela bai lukautim ol samting bilong kampani. Em ges projek bilong mipela. Mipela i tok tenkyu long gavman i givim luksave. Tenkyu long Hela Provinsal Edministreta William Bando i givim luksave.

"Bai yumi wok bung wantaim," Mista Akiye i tok.



WE ARE BSP

BANK WHERE YOU ARE

A BSP Agent provides you access to basic banking services anywhere in PNG. Do your banking where you are!



# Angore lidasip komiti kisim luksave

GAVMAN i luksave long wanpela lenona grup bilong Angore ges fil insait long Petroleum Development Laisens (PDL) 8 long PNG LNG Projek eria.

Minista bilong Petroleum na Eneji, Nixon Duban, i givim luksave pinis long Angore Wellhead Leadership Committee (AWLC) long las wik Fonde.

Mista Duban i tok gavman bai wok wantaim AWLC tasol bikos dispela grup i makim maus bilong ol foapela bikpela klen insait long Undupi ples we tripela welhet i stap long en.

Ol 4-pela siaman bilong foapela bikpela klen o wan pisin insait long Angore PDL 8 i kamapim dispela komiti long laik bilong ol papagraun tru long Angore.



Ekting Seketeri bilong DPE, David Manau (namel) i givim luksave pas bilong Minista Duban i go long Hari John Akiye (putim aiglas) taim Edministreta bilong Hela Provsins, William Bando (raithan) wantaim arapela tripela memba bilong AWLC i lukluk.

Ol dispela siaman em ol, Hari John Akiye (Halapura klen), Hari Elizah Timbah (Imika klen), Tambiawi Tangilape (Huru-pali) na Tamule Kulu (Pereke klen).

Mista Duban i tok gavman i luksave long dispela lenona lidasip komiti bikos ol i redim ol yet wantaim ol pipel long ples na ol i laik mekim wok stret long nem bilong ol papagraun na projek divelopa.

Mista Duban tok

gavman bai no inap wok wantaim arapela ol papagraun grup tasol, i givim luksave long AWLC, na bai wok wantaim dispela komiti long helpim projek i kamap gut, na long larim no gat wanpela asua o hevi i kamap long projek eria.

Ekting Seketeri bilong Dipatmen ov Petroleum na Eneji (DPE), David Manau, i tok ol wokman bilong DPE i wanbel long wok bung wantaim dis-

pela nupela papagraun grup.

“Mipela i laikim ol arapela papagraun grup long PNG LNG Projek long redim ol yet olsem. Mi laik salensim arapela ol lenona grup long Hides na Juha long bihainim dispela pasin bilong ol papagraun bilong Angore na stretim ol yet.

“Mipela i laik wokbung wantaim ol papagraun husat i redim ol yet. Na dispela pasin bilong

ol papagraun bilong PDL 8 long Angore i mekim mipela i amamas long wokbung wantaim ol,” Mista Manau i tok.

Em i tok Oltanativ Dispiut Risolusen (ADR) na Klen Veting Proses (CVP) bilong sekim na painimaut ol papagraun tru bilong Angore i no pinis yet.

“Taim dispela tupela namba wan samting i no pinis yet, mipela i lukim olsem i gat nid biong lidasip. Projek i nidim lidasip bilong ol pipel long projek eria.

“Mi laik tok tenkyu long long Mista Akiye wantaim ol tripela lenona lida bilong yumi long Angore i sanap wantaim long kirapim dispela komiti.

“Dispela komiti i kamap olsem haus man bilong ol papagraun. Sapos wanpela trabel o hevi o asua i kamap long projek eria, mipela i gat AWLC i stap pinis.

“Mi amamas tru long dispela,” Mista Manau i tok.

# Stopim kot na yumi wokbung wantaim



Ekting Sekreteri bilong DPE, Davis Manu wanatim Hela Provsinsal Edministreta, William Bando long Pot Mosbi.

PROVINSAL Edministreta bilong Hela, William Bando, i singautim ol papagraun bilong PNG LNG Projek long Hela long stopim ol kot na wokbung wantaim long skelim ol gutpela samting projek bai bringim i kam.

Mista Bando i mekim dispela singaut taim em i lukim olsem ol papagraun bilong Angore PDL 8 insait long Tari-Pori distrik i redim ol yet gut wanpela nupela lidasip komiti ol i kamapim long dispela yia.

Mista Bando i mekim dispela toktok long las wik Fonde long Pot Mosbi. Em i bin kam lukim wanpela bung bilong ol papa-

graun bilong Angore long Pot Mosbi we Dipatmen ov Petroleum na Eneji (DPE) i givim luksave long ol.

Angore Wellhead Leadership Committee (AWLC) em i nupela lenona lidasip komiti bilong makim maus bilong ol papagraun long PDL 8 insait long PNG LNG Projek eria.

Mista Bando i amamas long lukim olsem siaman bilong AWLC, Hari John Akiye, i go pas long bungim ol papagraun long Angore na kirapim dispela lidasip komiti.

“Mi wanbel tru long lukim dispela hatwok bilong Hari John Akiye i karim kaikai.

Dispela kain pasin long bungim ol papagraun long ples long stap wantaim na bungim tingting wantaim, bai karim gutpela kaikai,” Mista Bando i tok.

Em i tok ol manmeri husat i no gat wanpela graun long Angore i no ken giaman na tok ol tu bilong Angore.

“Bipo taim oil na ges i no kamap, Angore em i wanpela bus ples. Namba bilong ol manmeri i no planti, tasol taim LNG Projek i kamap, namba bilong ol manmeri i go antap hariap tru,” Mista Bando i tok.

Em i tok dispela kain pasin bilong giamanim gavman na stilim mani bilong arapela ol papagraun i mas stop.

Em i tok ol papagraun yet tu i mas stopim pasin bilong go kam long kot na stopim mani na arapela benefit long kot oda.

“Yumi mas stopim pasin bilong go kam tumas long kot. Mani ol pipel na provinsal gavman bilong yumi inap long kisim na kirapim ples, bai west nating long kot,” Mista Bando i tok.

Em i tok Hela Provsinsal Edministresin i givim luksave long grup bilong Mista Akiye.

“DPE wantaim Minista Nixon Duban i luksave long AWLC. Mipela long provinsal edministresin tu i givim luksave long yupela.

“Gutpela samting tru yupela i mekim. Mi harim olsem yupela bai bung na tokaut long dispela na mi stap long Tari na kam lukim dispela bung bikos mi amamas tru long lukim dispela kain samting i kamap long soim lidasip long papagraun,” Mista Bando i tok.



## URGENTLY REQUIRED

Free lance Advertising Sales Representative to sell Space Advertising and Bulk Subscription of *Wantokniuspepa* to government departments, Business houses, churches, schools & institutions, NGOs and interest individuals in their respective Provinces.

Are you retired, out of work or looking for something to do, this will be an ideal opportunity.

Attractive incentive is available to people who are willing to help themselves at their own time.

### Qualifications;

- Previous experience in selling advertising space or related industry but not necessary
- Living in provincial towns with own accommodation
- Own car
- Contactable mobile phone/Emails etc

If you meet the above criteria please send your expression of interest in the first instances to:

The Sales and Marketing Manager, Word Publishing Company Limited. P.O.Box 1982, BOROKO NCD. Ph: 3252500, Mobile Ph. 79187688 or email advertising@wantokniuspepa.com lbents@wantokniuspepa.com

Applications Close 4th of November 2016.



**Wantok niuspepa i laikim ol eijen insait long Madang, Kimbe, Kundiawa, Wewak, Jiwaka, Tari, Kiunga, Tabubil, Daru, Kerema, Manus, Kavieng na Alotau long salim niuspepa bilong mipela.**

**Mipela i laikim ol Eijen long distributim niuspepa long dispela ol ples antap hariap tru!**

Sapos yu ting yu em rait man o meri long dispela wok, ringim Sekulesen Supavaisor bilong mipela long Fon: **325 2500 o email i kam long: lbents@wantokniuspepa.com**

# Sanap Wantaim: Em i nupela wei

**JAY Lieasi, wantaim PNG anda 20 (U-20) tim bilong ol meri wantaim NCDC, UN Wimen na Sivel Sosaiti i bung wantaim logn kamapim nupela wei bilong ol meri ; yangpela pikinini meri wantaim ol bikpela meri long stap seif insait long Pot Mosbi.**

Las wik Fonde nupela UN Wimen Yut Sempion, Jay Lieasi wantaim ol PNG U-20 Wimen Nesenal Tim, Gavana bilong NCD, Powes Parkop, Dokta Jeffery Buchanan, UN Wimen PNG Kantri Dairekta na ol yut bilong kain kain ogenaimesen insait long siti i sanap bung wantaim long tokaut long visen bilong nupela wei bilong stap long Pot Mosbi.

Gavana Parkop i tok, "Bel isi em i namba wan rot long kamapim gutpela sindaun na gutpela laip long kantri na long wan wan komiyuniti. Ol meri i kamapim hap namba bilong kantri, olsem na taim ol i stap gut na inapim ol driman bilong ol long ples we i seif, yumi ken gat gutpela kwaliti laip na kamapim gutpela laip long bihain taim."

"Rait bilong ol meri em i rait bilong olgeta pipel, long stap fri long vailens, pret long kisim bagarap na em i rait bilong olgeta aninit long konstitusen, na em i namba wan

gol bilong ol bikpela meri na ol yangpela pikinini meri tu. Yumi mas mekim samting nau na bringim bel isi kam bek long siti bilong yumi, long ol rot bilong yumi, long ol haus bilong yumi na long kantri bilong yumi!" Mista Parkop i tok.

Dispela kempen, SANAP WANTAIM kempen i laik bringim ol bikpela man, meri na ol yangpela pikinini olsem ol wanlain tasol na patna long mekim Pot Mosbi siti i kamap seif long olgeta lain i ken stap long en.

"Mi kamap olsem wanpela memba bilong UN Wimen olsem Yut Sempion long kamapim seif siti long Pot Mosbi bilong ol meri na ol yangpela pikinini meri em i bikpela samting. Mi gat sans long kamapim sampela senis insait long kantri bilong mi yet Papua Niugini em i wanpela wanpela samting we mi gat bikpela rispek long en na mi gat strongpela tingting long en." Mista Lieasi i tok.

Mis Gabong, PNG U20 Wimen Nesenal Tim Kepten i tok, "mipela



Meri anda 20 Nesenel soka tim i saptim SANAP WANTAIM kempen. Poto: Media Partners.

i no gat tubel long saptim dispela kempen, bilong meri i stap wankain olsem man, sefti bilong meri em i samting we mipela i gat strongpela tingting long en."

"I gat wanpela nupela wei i wok long kamap insait long kantri bilong yumi we ol meri bai stap seif na lukim ol driman bilong ol i karim

kaikai. Mipela i laik stap insait wok bilong strongim ol meri long go het long kamapim gutpela sindaun long bihain!" Mis Gabong i tok.

Dokta Jeffery Buchanan, UN Wimen PNG Kantri Dairekta i tok, "Mipela i laikim olgeta lain long Pot Mosbi siti long kam wantaim mipela. Wan wan bilong mipela i

ken mekim senis. Yumi mas strongim rait bilong ol meri na ol yangpela pikinini meri insait long siti long stap olsem dispela siti em i ples bilong ol.

"Taim ol i wokabaut long ol rot, go long stua, ran long PMV bas, go long skul, wok na long stap bel isi wantaim gutpela laip. "

## Mama long Basamuk winim tok pait long prais wantaim ol Saina

James G. Kila i raitim

OL asples maket mama long Basamuk eria long Raikos distrik i sempion stret nau long bagen o tok-pait long ol maket kaikai prais wantaim ol Saina wok lain.

Ol i save gut long bekim na sakim maus bilong ol Saina lain husat i save laik tok-pait na gris long baim ol kaikai na kumu long 'Marmar' maket klostu long liklik taun long Basamuk.

Planti ol dispela mama i save bringim ol kumu na ol arapela gaden kaikai olsem anien, lombo, kabis, popo, banana mau, na ol arapela gaden kaikai. Na olgeta morning, ol Saina lain i save pulim lain i go long dispela maket na baim ol samting.

Tasol, wanpela samting long ol dispela lain Saina, em ol i no save baim stret long prais yu makim long en, nogat. Planti taim ol bai mekim tok gris i go kam na askim long daunim prais.

Planti taim ol asples mama long Basamuk i save sakim tok bilong ol na tok 'Meiyo, meiyo,' (nogat, nogat) na ol arapela tokples em ol wantaim ol Saina lain long Basamuk i save na i save tromoi i go i kam long ol yet.

Ol dispela Saina lain i save wok wantaim Ramu NiCo Menesmen (MCC), long Madang.



Long las wiken, dispela ripota i bin stap long maket long Basamuk na lukim wanpela meri Saina i go askim long baim tupela ples kakaruk.

Ol Saina lain i save laikim stret ol ples kakaruk bikos long ples bilong ol, ol i gat planti kain kain kala ples-kakaruk na ol i save kukim long stail bilong ol yet na kaikai wantaim kumu na kain kain sos bilong ol yet na ol save gut stret.

Dispela mama long maket i salim tupela ples kakaruk, wan wan em K30.

Wanpela wok meri bilong Saina i lukim na mangal stret

na karim K40 go na sanap lukluk i stap, tasol em no save tumas long Tok Pisin, olsem na em tanim go bek na singautim wantok bilong em Saina man long go wantaim em na toktok.

Saina man i go na askim meri Basamuk olsem: "Poloman a, mi giv yu K40 na get tupela a?...Wantu tru meri Basamuk bekim na tok "meiyo, meiyo."

Tupela man na meri i mekim go go na ol i go askim narapela Saina man gen long helpim long bagen o tok-pait long prais bilong ol kakaruk ya. Tasol mama bilong Basamuk i strong tru na stap

Meri Basamuk winim bagen o tok-pait long prais na ol meri Saina tekov.

strong long prais bilong em yet.

Tripela lain Saina i mekim sori toktok na soim K40 long meri Basamuk, tasol em sanap strong yet long sait bilong em. Ol Saina lain ya i mekim go nogat, na ol lusim na go.

Yes ya, ol lain mama bilong Basamuk tude i save gut stret long tok-pait wantaim ol Saina lain bikos long taim yet

Ramu Nikel Projek i statim operesen bilong en na wok i kamap long wokim Basamuk Rifaineri, ol save long pasin na wei ol Saina lain i save bagen long daunim prais na baim samting.

## Namba wan meri long go antap long Maun Everest i dai

Stori na ol Poto i kam long AP

SPOT bilong "climbing" o go antap long maunten o ol narapela bikpela bilding o wanem moa i bilong ol man, tasol nau, ol meri tu i go insait long en.

Go antap long maunten na kamap long antap hap stret em i hat moa sapos maunten ya i longpela we tumas.

Em i hat moa long ol meri, tasol Junko Tabei, meri Japan i stap insait long spot bilong go antap long maunten, i bin pait hat long senisim dispela taim em i kamap namba wan meri long kamap antap long bikpela maunten tru long wol, Maun Everest, long kantri Nepal long mun Me, 1975.

Long dispela wik, Junko i gat 77 krismas na paionia meri klaima i bin dai bihain long sik kensa i daunim em.

Em i bin opim dua bilong ol meri klaima long wol na 40 krismas, moa long 400 meri i bihainim lekmak husat i gat wantaim 13 krismas i yangpela moa long olgeta long meri klaima.

Narapela meri klaima, Lakpa Sherpa, i go antap long Maun Everest planti taim winim ol arapela meri. Long yia 1953, em i bin



Junko Tabei

namba wan taim long man i go antap long Man Everest na i kam inap nau, moa long 7,000 pipel i go antap pinis long Maun Everest.

Long dispela 7,000 pipel, 200 i go antap wantaim no gat helpim bilong helpim oksijen long pulim gut winim long antap bilong maunten. Long planti handet yia, ol Sherpa pipel em ol asples bilong Nepal i save helpim planti klaima i go antap long Maun Everest.

Long ol yia long 1970 long Japan, bikpela tingting em ol man i go wok na ol meri i stap long haus lukautim famili, Junko i bin tokim Japan Times.

Tasol dispela i no bin stopim Junko na em i bin go het long go antap long ol bikpela maunten long wol insait long wan wan kontinuen we ol i kolim long "Seven Samit."

Junko i bin wokim nupela mak long go antap na em i bin tok bai em i no inap stop long wokim dispela.



1

We're celebrating our 1st Birthday in November with Super Low Fares



Lae	↔	Madang	K 311
Lae	↔	Wewak	K 466
Madang	↔	Wewak	K 311
Madang	↔	Vanimo	K 391
Port Moresby	↔	Daru	K 400
Port Moresby	↔	Goroka	K 370
Port Moresby	↔	Alotau	K 350
Port Moresby	↔	Hoskins	K 401
Port Moresby	↔	Mt. Hagen	K 370
Port Moresby	↔	Lae	K 311
Port Moresby	↔	Madang	K 391
Port Moresby	↔	Popondetta	K 310
Port Moresby	↔	Rabaul	K 461
Port Moresby	↔	Wewak	K 441
Rabaul	↔	Buka	K 329
Rabaul	↔	Kavieng	K 291
Wewak	↔	Vanimo	K 291

Book now, Save now.

Booking period for the special fares is between Tuesday 1st November to Monday 7th November 2016, for travel between Saturday 5th November to Wednesday 30th November. Special fare rules apply and seats are limited.



CENTRAL RESERVATIONS Phone: + 675 7222 2151 Email: reservations@pngair.com.pg

# PNG fasen nau i stap long intanesenel level



Amanda Donigi, Faunda na Edita bilong Stella Magazine; Mis Bronte Moules, Deputi Hai Komisina bilong Australia long PNG; Mis Jannike Seiuli Faunda/Krieti Dairekta, Sydney Fasen So/Pacific Runway; Mis Betsabeh Sohrabi, Asistanten Program Dairekta Fasen Maketing- Raffles Kolis bilong Disain na Komes; Mis Genevieve Igara-Falevai, long Stella Runway 2016 Disaina bilong Yia i bin kamap long las mun, Septemba.

**WANPELA yangpela meri PNG i disaina bilong klos i wok long soim ol klos na disain bilong PNG long intanesenel level.**

Genevieve Igara-Falevai em disaina na faunda bilong Wantok Clothing na 2016 Runway Disaina bilong Yia, i bin soim ol PNG disain klos long Pacific Runway 2016 long Sydney long las wik Fraide.

Genevieve i bin skul na greduet long lkonomiks, tasol em i

wokim disisen long go insait long fasen na lusim wok ikonoms we em i skul long en.

Em i bin statim lebel bilong em long las yia, 2015, na em i winim ol fasen resis long Miss Pacific Islands Pageant Project Runway 2015 na 2016; Stella Runway 2016 Disaina bilong Yia; na dresa bilong Miss PNG 2015 na 2016.

Hai Komisina bilong Australia i bin patna wantaim Stella Mesgesin na Raffles Kolis ov Disain na Komes i stap long Sydney long

sapotim Genevieve long go insait long ol trening long Sydney na long Pasifik, na long go insait tu long Stella Runway 2016 Disaina bilong Yia Awod long na tu, long Pasifik Runway 2016.

Australia i sapotim ol meri long strongim ol long ikonomsait long fasen o stail klos bisnis na Pasifik Projek Papua New Guinea, we i developim bilum bisnis wantaim ol bilum produsa grup Goroka na Moun Hagen insait long Hailans rijon.

## Mekim na Save

Sapta 2 ...moa yet I kam long hap 1 (Taro)

### Kaikai bilong givim strong

**Tok bilong binatang na sik**  
Wanpela binatang i save bagarapim kaikai bilong yam, taim em i stap long graun yet.

Sapos dispela hevi i bikpela tumas long hap bilong yu, orait, yu ken traim long putim marasin long hul, taim yu planim yam.

Marasin ol i kolim 6% Lindane Granules.

Wanpela sik i save kamap long lip bilong yam na ol blakpela mak i save kamap long lip.

Sapos yu lukim dispela kain sik i kamap long ol yam bilong yu orait, painim nupela hap graun bilong wokim gaden yam, maski planim long olupela gaden.

**Tok bilong kamautim yam**  
Taim lip na rop i drai olgeta, em nau, yumi tok, yam i bruk na em i redi bilong kamautim.

Na sapos yu laik lusim i stap insait long graun na kisim bihain, em tu i orait. Em i no inap sting kwik.

### MEKIM WANEM LONG YAM

Em i gutpela kaikia bilong man na bilong ol abus tu. Skin bilong en i gutpela kaikai bilong ol pik na pato.

Yu ken kukim yam long gris, olsem kaukau. Swit bilong em i winim kaukau, na taro na potato.

Yu ken memeim tu. Yu ken wokim plaua long em tu.

### Memeim yam

Sapos yam, katim i go liklik. Tan pinis, putim long garamut na sutim. Sutim pinis, orait, bungim wantaim pis o pinat na kaikai. Yu ken karamapim long lip tu na kukim. Yu ken kukim long praipen tu.

### Plaua yam

Olpela rot i stap olsem: Katim yam i go liklik na putim long san. Taim em i drai pinis, sutim long garamut na kamap plaua.

Long Wes Afrika ol i kamapim wanpela nupela rot. Ol i wasim yam gut. Ol i no sapim.

Ol i katim, na kukim. Bihain ol i tekewe skin, na ol i memeim yam. Bihain ol i putim long san na mekim drai.

Drai pinis, orait, ol i brukim i kamap plaua. Ol i putim long siv na ol i pulimapim plaua tru bilong en i go long plastik bek na pasim gut.

# MARIANVILLE Sekendari wet yet long TFF mani

Paul Zuvani i raitim

**MARIANVILLE Sekendari Skul ausait long Pot Mosbi i wet yet long kisim olgeta tiusen fi fri subsidi bilong em, prinsipel Sista Angela Taylor, OLSH, i tok.**

Em i tok sapos gavman i no givim olgeta mani, em bai pasim skul. Moa yet dispela bai i no inap helpim skul taim 2017 ekedemik yia i stat.

Sr Angela i mekim dispela tok bihainim tok Minista bilong Fainens i mekim long Palamen olsem gavman i

givim pinis K712 milien TFF mani bilong tem wan i go inap long tem tri.

Dispela em olsem 70 pesen bilong mani gavman i makim.

Tasol Sr Angela i tok sapos dispela mani i kam em bai lukim tasol em i no lukim yet wanpela bilong dispela ol mani.

Long wankain taim Bod ov menesmen bilong ol Katolik TVET (teknikel vokesenel edukesen trening) i tok long pasim skul bilong long hevi bilong TFF.

Ol i askim Edukesen Dipat-

men long baim ol tem tri na tem foa tiusen fi fri (TFF) subsidi we Dipatmen i no baim yet.

I gat moa long 50 Katolik TVET skul long kantri.

Nau yet menesa bilong dispela ol trening skul bai bung na kisim trening long wok bilong ol na ol bai tok-tok moa long hevi bilong TFF.

I gat bilip Gavman i baim hap mani tasol i go long ol skul na i no baim ol stret long mani em i tok long em.

Long dispela as Memba bilong Lae, Louzaya Kouza, i tok het tisa bilong sampela ol skul long Lae i bin tokim

em olsem ol i no inap ranim gut skul bikos long hevi bilong mani.

“Long Lae distrik, 21 skul i laik pas bikos ol i no gat mani bilong operet. Ol i no kisim TFF subsidi mani long gavman,” Kouza i tok.

Edukesen Minista Nick Kuman i tok gavman i baim pinis K125 milien bilong tem tri na mani bilong tem foa bai go yet.

Praim Minista Peter O’Neill i tok gavman bai no inap daunim mak bilong mani edukesen bai kisim long 2017 Baset.



## Mekim mani long ol lokal prodak

PLANTI bilong yumi i save gat tingting olsem olgeta gutpela samting i mas kam long ausait.

Yumi ting olsem wanem samting yumi mekim long han bilong yumi yet em i rabis. Dispela kain tingting i no inap helpim wanpela man o meri o komyuniti.

Lukluk long ol liklik tebol maket bai yu lukim twistis, loli, bisket, na smuk. Long ol maket long ol ples bai yu lukim nudels, tinpis na rais tu i stap. Husat i mekim dispela ol samting? Ol samting ya ol i mekim long sampela pektori long sampela longwe ples.

Planti kain krangki tingting i stap nau wantaim dispela kain pasin bilong maket. Em i isi long baim na salim samting na lus tingting nau long mekim na salim.

Loli em i no bikpela mani long holisel bakstua.

Na taim mama i salim dispela loli long maket em i ken mekim tupela taim moa mani long dispela em i tromoi long stua. Yes, planti bai i tok dispela ol liklik maket i bringim mani i kam long famili.

Tasol skelim gut. Loli i bringim wanem gutpela samting i kam long pikinini? Dispela loli i save helpim bodi bilong dispela pikinini olsem wanem? Tingim. I gat wanpela tok em i tok olsem: Bodi bilong manmeri em i piksa bilong kaikai ol i kaikai long en.

Sapos yumi putim pipia insait long bodi bilong yumi bai yumi luk olsem dispela kaikai.

Tingting bilong mekim hariap mani i ken bringim planti birua long bodi bilong ol pipol. Ol pikinini i no save long gutpela i stap long muli na popo na ol i kraik long liklik loli.

Ol mama i ting em i orait wanpela loli em bai pikinini i stap isi. Tasol mekim olsem planti taim na wanem kain pikinini bai i kamap?

Nudels i bringim planti les insait long ol famili. Mama i no ken bisi long kukim gutpela banana na taro na kumu. Em i laik mekim faskuk nau. Kukim tasol nudels long hatwara na hariap tru hangre bai i ranawe.

Ol bikpela kampani i amamas tru ol samting ol i mekim i go aut kwiktai na ol i ken mekim moa na kisim moa mani. Maski sapos dispela ol samting i no gutpela long bodi bilong ol pipol. Ol i wari tasol long mekim moa mani.

Long ol ples na ol tebol maket long taun wanem samting i rong long ol mama i salim sampela samting ol yet i kukim long haus. Sampela mama i kukim banana na tapiok sips. Olsem wanem i no gat luksave long dispela? We stap ol pinat na sugaken long ol dispela tebol maket?

Sapos ol mama i kirapim ol liklik bekeri bilong bret na bans bai i gat sapot long dispela ol wok?

PNG i mas stat lukluk long wanem kain ol kaikai, maski liklik samting tru, yumi givim ol pikinini bilong yumi. Yumi mas lukaut long ol sik i kam wantaim ol kaikai ol i mekim long ol pektori. Ol dokta i luksave nau olsem dispela ol sik i wok long kamap planti nau.

Mama i gat wok long lukautim helt bilong pikinini bilong em tasol na sapos em i amamas long mekim mani tasol na i no kia long ol pikinini em tu i helpim long kilim PNG.

Bai yumi mekim wanem? Tingting long mekim ol samting long han na salim. Long dispela rot mani bai i stap oltaim wantaim famili na bai i gro na famili i ken stap helti tu.

# Vudal yunivesiti laik strongim wok didiman

Paul Zuvani i raitim

YUNIVESITI bilong Naturel Risoses na Environment (UNRE) long Vudal, Is Nu Britain laik strongim wok didiman, nupela Vais Sansela Profesa John Warren i tok.

Long wokabaut bilong em i kam long Wantok Niuspepa long dispela wik, Profesa Warren i tok Yunivesiti bai strongim tasol save ol manmeri i gat pinis long wok didiman.

Em i tok i gat planti salens yunivesiti i gat olsem hevi bilong sik kakau na kopi we yunivesiti i mas painim rot long daunim. Na i gat hevi bilong mani we yunivesiti i gat long kamapim wok.

Tasol em i tok isi isi yunivesiti bai traime stretim dispela ol hevi.

“Long sik kakau (pot bora) em i bikpela hevi na i samting yunivesiti i laik



Profesa Warren

lukluk na pait egen-sim,” Profesa Warren i tok.

“Tis na mekim risets i save go wantaim. Wanpela i no save go bilong em yet.

“Bikos long hevi bilong ol risos mipela i no laik kamapim ol nupela risets bai

mipela i yusim mani. “Mipela bai strongim tasol save ol manmeri i gat pinis na askim ol manmeri long yusim dispela save ol i gat pinis long wok didiman.

“Mipela i laik serim dispela ol save namel long ol fama olsem ol

i ken yusim dispela long helpim ol yet.

Em i tok long wok bilong em olsem tisa em i save kamapim ol gutpela risets long strongim wok didiman. We i gat mani yunivesiti bai karimaut nupela risets.

Arere long dispela em i tok yunivesiti bai kamapim tripela nupela digri program tu.

Nau yet em i gat tupela digri em tropikel egrikalsa na marin na fiseris.

“Mipela i bai putim narapela tripela digri em enamel sains, forestri na turisim.

“Dispela bai kamap long narapela tripela yia.

“Mipela bai skelim kos we level bilong em i wankain olsem bilong ol narapela yu-

nivesiti long wol.

“Dispela long mekim standet mipela i skulim ol sumatin i no daunilo. Sumatin bilong ol i ken kam mekim risets long hia na sumatin bilong mipela i ken go na mekim risets long hap bilong ol.”

Em i tok i gat planti salens yunivesiti i gat long em tasol i gat ol ansa bilong dispela ol i stap.

Em i tok planti haus olsem bilong haus tisa na domitori i stap nau i bilong bipo na i nidim mentenens o yunivesiti i mas senisim olgeta.

Long dispela em i tok em i toktok wantiam Embaseda bilong Saina Li Ruiyou na Embaseda i amamas long helpim.

Em i tok Ruiyou i tok Saina Embasi bai stat wantaim domitori na bihain go long stretim ol narapela samting long yunivesiti.

# Rurel Mopo Praimeri Skul sumatin sindaun long eksam

James G. Kila i raitim

WANPELA komyuniti lida bilong Sumao-Garia senses divisen long Usino lokal level gavman wod 19, Thomas Wekmara i givim bikpela tok amamas bilong em long ol Nesenel Edukesen Dipatmen na Madang Divisen ov Edukesen long redim ol eksaminesin pepa long Gret 8 sumatin bilong Mopo praimereri skul long taim stret.

Mopo praimereri skul em i wanpela rurel praimereri skul long wod 19 long Usino LLG long Usino-Bundi distrik long Madang provins. Ol rurel sumatin save givim



Ol gret 8 sumatin bilong Mopo praimereri skul long Sumao-Garia eria long Begesin long Madang provins i sindaun long gret 8 eksam.

moa taim bilong ol long skul maski olsem skul em longwe long taun we i no gat planti gavman sevis. Ol tisa na sumatin save givim moa taim na sakrifais long lainim samting.

Wekmara i tok dispela yia 62 gret 8 sumatin bilong

Mopo praimereri skul i bin sindaun long gret 8 Nesenel Eksaminesin. Tupela tisa bilong Ono Praimereri skul i bin go long Mopo na slip long hap long supevais o stap olsem invijileta long eksam.

Wekmara i tok maski

olsem Mopo praimereri skul long Begesin em longwe tru long rurel eria, ol sumatin save skul strong stret long kisim gutpela save long rit na rait na save long wanem samting i kamap long autsait wol.

Wekmara i tokaut olsem long las yia 36 sumatin bilong Mopo praimereri i bin mekim gut stret na i bin go long St. Michael Brahman Sekenderi Skul.

Em i tokaut olsem long ripot i kamaut olsem long neks yia nupela skul bai opim dua long Sausi, na em i bilip sampela sumatin bilong Mopo bai go skul long hap.

# Trukai gat bikpela plen long kirapim PNG egrikalsa

DE Okotoba 16 em i wanpela bikpela intanesenel de we Fud na Egrikalsa Ogenisesen (FAO) bilong Yunaitet Nesens (UN) i save givim luksave long namba wan samting kaikai i save mekim long laip bilong ol manmeri.

Long Trukai Industries, em i ples klia olsem dispela kampani tasol i sanap antap long arapela ol kampani bilong kamapim kaikai insait long PNG faming na egrikalsa sekta.

Trukai Industries i save kamapim namba wan kaikai bilong ol manmeri PNG, Trukai Rais, na dispela pasin bilong Trukai long sevim laip bilong planti manmeri long diveloping kantri olsem PNG, em i wanpela namba samting we FAO i laikim long en.

Sif Eksekutiv Opisa (CEO) bilong Trukai Industries, Greg Worthington-Eyre, i tok plen bilong Trukai long kirapim ol nupela program long apim level bilong save long ol asples manmeri long groim na planim rais long PNG, em i wanpela samting we FAO i laikim long en.

FAO i laikim ol bikpela kampani we i stap long egrikalsa sekta long helpim ol manmeri long diveloping kantri olsem PNG long skelim save, lainim ol na helpim ol long kamap fama long planim ol kaikai na kamapim kaikai olsem rais long helpim famili bilong ol.

Trukai i yusim moa long K181 milien long bikpela mil na faktori bilong em long Lae, Morobe Provins wantaim ol wan wan senta bilong skelim na salim rais na ol



CEO bilong Trukai Industries, Worthington-Eyre.

prosesing fasiliti long faktori.

Antap long en, Trukai i putim K5.5 milien baim ol nupela mesin bilong kamapim rais fam.

Dispela invesmen bilong Trukai i lukim moa long 100,000 manmeri PNG i kisim planti gutpela samting o benefit taim ol i wok wantaim Trukai, olsem wok manmeri, fama, o mekim arapela kontrak wok wantaim Trukai long olgeta hap bilong kantri.

Insait long las faiv yias, Trukai i investim klostu long K60 milien long testim ol kain kain kaikai bilong planim, trenim ol asples manmeri na givim ol mesin long stretim kaikai na apim level bilong sekyuriti bilong kaikai long PNG.

Mista Worthington-Eyre i tok namel long yia 2010 na yia 2015 tasol, Trukai i givim K30 milien long helpim ol liklik fama manmeri o ol smol holda fama long PNG long planim rais.

Trukai i save baim bek gen rais



Trukai Industries i baim 6-pela tan bilong rais pedi long ol Rais Groas Kopretiv Grup long Oro Provins long las yia.

long ol asples fama husat i save planim rais na givim mani long ol long helpim famili na sindaun bilong ol.

“Em i bikpela wok tru taim yu lukim olsem mipela i putim dispela kain man imak i go insait long helpim ol manmeri bilong yumi long PNG, kirapim komyuniti, givm save long planim kaikai na helpim ol manmeri long gat gutpela sindaun,” Mista Worthington-Eyre i tok.

Em i tok gutpela samting Trukai Industries bai kisim long dispela invesmen bai kamap planti yia long bihain taim. Mista Worthington-

Eyre i tok Trukai i statim bikpela wok long kamapim ol samting bilong egrikalsa o infrastraksa samting long kirapim bikpela komesel fam insait long kantri.

“Mipela i statim ol projek long sekim sapos graun long Wes Nu Briten, Sentral, Morobe na Oro provins i orait long mipela i statim bikpela rais fam.

“Bikpela samting em i pasin bilong wokbung. Sapos ol wan wan komyuniti, provinsal gavman na lokal level gavman, i wokbung wantaim mipela, em bai isi long kirapim bikpela rais fam.

“Dispela kain rais fam bai no inap kamapim rais bilong kaikai tasol. Em bai kamapim nupela samting bilong mekim mani, we komyuniti i ken planim rais, salim na mekim mani.

“Nupela stail bilong Trukai long lukautim ol bulmakau na planim rais wantaim long fam bilong em tu i soim wanpela gutpela piksa long wanem samting FAO i laikim ol bikpela kampani bilong mekim kaikai long mekim long helpim divelopen bilong kantri,” Mista Worthington-Eyre i tok.

Em i tok Trukai nau i gat bikpela komesel fam bilong lukautim buluma kau long Erap fam ausait long Lae.

Dispela ples bilong lukautim bulmakau em inap planim rais wantaim i kamap olsem wanpela model fam we PNG i ken kamapim long kirapim egrikalsa sekta.

Mista Worthington-Eyre i tok Erap fam bilong Trukai i gat 2,000 bulmakau na dispela i soim olsem Trukai i sapotim egrikalsa long PNG.

Pasin bilong lukautim bulmakau

na planim rais wantaim i soim olsem PNG i gat bikpela sans long planim kaikai na lukautim ol enimol olsem kau bikos envairomen i sapotim dispela ol kamap.

Trukai i lukautim ol dispela bulmakau long Erap long mak bilong ol dispela enimal i ken stap gut aninit long gutpela was bilong ol wokman.

Trukai i save kamapim Mung bin na stokfid o kaikai bilong enimol long Erap. Dispela stokfid i save kamapim gutpela kaikai bilong ol dispela bulmakau we Trukai yet i lukautim long hap.

Mista Worthington-Eyre i bilip olsem klostu long 35 pesen bilong ol manmeri PNG husat i stap long ol ples (2.1 milien manmeri) i no save kisim gutpela kaikai long helpim bodi bilong ol.

Em i tok Trukai i laik salim Mung bin long maket na givim i go long pipel na helpim laip bilong ol manmeri.

Em i tok Mung bin i gat 18 pesen abus, wankain olsem mit o kakaruk, na Mung bin i ken helpim ol manmeri long ples i kisim gutpela abus na helpim laip bilong ol.

“Taim mipela i planim Mung bin, dispela i wok long helpim graun long mipela i ken planim rais, na stopim sampela kain sik bilong graun na kaikai i kamap,” em i tok.

“Rais em i namba wan bisnis bilong Trukai, tasol nupela divelopen long planim arapela kaikai na lukautim bulmakau, em i kamap nupela pasin bilong Trukai long helpim ol asples manmeri long PNG.”



Buluma kau bilong Trukai Industries long Erap Fam ausait long Lae, Morobe Provins.



# Daltron donetim komputa long Boroko Rotari Klap

DALTRON, wanpela bikpela komputa kampani long kantri i bin wokim wanpela donesen i go long Rotari Klap bilong Boroko long helpim ol long ranim wok bilong daunim sik sevaikel kensa long PNG.

Long dispela donesen, Daltron i givim tupela leptop komputa na tupela printa. Mista Togara Asiba, Presiden bilong Klap wantaim Lionel Melville, Tresera bilong Klap i bin stap long kisim dispela ol donesen.

Mista Melville i tok Klap i painim pinis sampela mani long bringim ol vaksin bilong sik sevaikel kensa fri long ol sikmeri. Em i tok, mak bilong Klap em long givim vaksinesen long 28, 000 sumatin meri long ol gavman skul insait long Nesenel Kepitel Distrik, krismas bilong ol i stapnamel long 9 na 13 yia long taim skul yia i kirap long 2017.

Dispela pailot projek bai lukim ran bilong en insait long NCD olsem sapos em i go gut bai ol i kisim i go long ol narapela senta ausait long NCD.

Mista Melville i tok olsem dispela projek i kamap wantaim helpim bilong UNICEF na Helt Dipatmen.

Maketing Supevaisa bilong Daltron Madeleine Pake i tok, Mista Togara Asiba, i tok olsem Klap bai holim wanpela belo kaikai long Novemba 1 na olgeta donesen bilong Daltron em bai ol i putim long oksen insait long dispela belo kaikai long Stanley Hotel na mani bai ol i givim long dispela projek.



Sels meri bilong Daltron long sait i sanap wantaim Mista Togara Asiba, Presiden bilong Rotari Klap Boroko.

# Gavana Jeneral i stap orait long Brisbane haus sik wod

**GREN Sif Sir Michael Ogio, Gavana Jeneral bilong Papua Niugini i wok long kamap orait nau na em i lusim intensiv ke unit na i stap long wanpela haus sik wod long Brisbane, Australia.**

Ripot i kam long gavman haus i tok olsem, Gren Sif Sir Michael nau inap long kirap em yet na wokabaut na sindaun long bet bilong en. Em i bin go insait long PIH haus sik long Pot Mosbi las wik Trinde na bihain ol i kisim em hariap i go long Brisbane long Fraide taim sik bilong en i no bin orait.

Seketeri bipo, Sir Tipo

Vuatha i bin toktok wantaim Gavana Jeneral long telepon na i tok olsem Gren Sif Sir Michael i wok long kamap orait.

“Gavana Jeneral i wok long kamap orait. Em i kaikai gut na i wokabaut. Em i kamap gut moa nau,” Sir Tipo i tok.

Ol dokta na ol medikol wokman na wokmeri i wok long was gut long en na lukluk long givim ol marasin na long sik bilong en i go olsem wanem.

Gavman i bin givim tok orait long karim Sir Michael i go hariap long Brisbane las wik Fraide taim ol dokta long

Pasifik Intenese nel Haus sik i bin lukim olsem sik bilong en i bin go bikpela tuma s. Tenkyu tru long tok orait bilong Praim Minista Peter O’Neil long helpim Sir Michael long go long Australia.

Opis bilong Gavana Jeneral i tok tenkyu long ol pipel bi-



Gavana Jeneral Gren Sif Sir Michael Ogio

long PNG long salim ol preana gutpela toktok long en na ol i askim ol pipel long pre yet long Gavana Jeneral.

# Kristen Helt Sevis no kisim stret pe

**Paul Zuvani i raitim**

KRISTEN HELT Sevises (CHS) i kisim K5.4 milien tasol long wan wan mun subsidi bilong em long Gavman, CHS sif eksekeutiv opisa Joseph Sika i tok.

Sika i tok wantaim dispela em i no lukim yet dispela K20 milien bilong 2016 Saplimentari Baset we Gavman i tokaut long mun i go pinis. Dispela mani i kamap bihain long pastaim disisen Gavman i mekim long katim K50 milien bilong CHS long 2016 baset.

Bikos long dispela disisen Sika i tok stap bilong ol long

mekim wok i hat na em i wok long kisim yet ripot bilong wan wan helt ejensi bilong ol.

Em i tok CHS i mas kisim K8 milien long wan wan mun tasol dispela i no kamap na stat long Julai Gavman i katim K2.6 milien na givim tasol K5.4 milien.

Sika i tok pastaim long Julai Gavman i bin save katim K2 milien na i save givim K6 milien. Tasol nau em i katim narapela K600,000.

Em i tok long daun peimen planti hevi bilong ol ejensi long mekim wok i stap yet.

“Mipela i wok long kisim mani bilong wan wan mun na i salim long het opis bilong ol

sios helt ejensi long provins. Ol yet i tilim dispela mani i go long ol haus sik bilong ol,” Sika i tok.

“Mipela bai kisim mani bilong Disemba bihain long dispela mun.

“Bihainim wok skelim bilong mani plen, mipela i wok long kisim mani daunbilo long mani mak mipela i mas kisim long wan wan mun.”

Em i tok bihainim disisen bilong CHS Bod, em i no inap tokaut sapos ol bai pasim ol ejensi bilong ol o no gat.

Em i tok bikos long hevi bilong mani i no go hariap CHS long Septemba i bin tok long pasim ol ejensi bilong ol.

Tasol dispela nau i senis bikos Gavman i stat long givim mani hariap.

Hevi bilong CHS ejensi i stat taim Gavman i bin katim K50 milien long K150 milien mani em i makim long 2016 mani plen bilong em.

Tasol planti tok pait i kamap bihain long dispela disisen na Gavman long mun i go pinis i putim bek K20 milien i go long CHS.

Long dispela Sika i tok: “Mi no kisim yet dispela mani. Mi sekap wantaim Dipatmen bilong Helt na Tresari tasol i luk olsem no gat mani.”

Wantok Niuspepa i askim Helt Dipatmen long dispela mani tasol i no bin inap long kisim bekim.

# Dokta Jambi Garap kisim Ai Helt Hiro Awot

NESENEL Privensen ov Blaines Komiti na Jeneral Ai Helt Komuniti i tok amamas long Dokta Jambi Garap na Dokta David Pahau long kisim wanpela bikpela nem Awot long Intenesenel Ejensi Privensen ov Blaines long namba 10 Jeneral Asembli long Durban, Saut Afrika.

Ai Helt Hiro program em i wanpela wok bilong Intenesenel Ejensi ov Privensen ov Blaines (IAPB) wantaim patnasp bilong L’OCCITANE Faundesesen.

Ol i kamapim long selebretim wok bilong ai ke dokta na long ol lain i save wok go pas olgeta de long mekim trupela senis long wol bilong ai helt ke.

Namel long ol 24 wina long wol, tupela bilong ol i bin kisim ol travel



gren i kam long faundesesen long em. kisim awot long han bilong ol yet

Dokta Jambi Garap i bin wanpela

Long hankais i go hansut: Drew Keys, Jeneral Menesa PNG Eye Care, Dokta Jambi Garap, Presiden bilong Privensen ov Blaines Komitei PNG, Samuel Peter Koim, Senia Menesa PNG Eye Care, Mitasha Yu, Brien Holden Vision Rijonal Dairekta, Asia Pacific na Anthea Burnett, Senia Risets Opisa Brien Holden Vision Institut (BHVI) i sanap long fran bilong PNG Eye Care Posta long ICC Durban, Saut Afrika. Foto: PNG Eye Care

bilong dispela tupela wina. Em i bin stap long Jeneral Asembli na i

kisim awot long 30 Septemba, 2016.

Papua Niugini tu i bin kamapim 6-pela posta na tupela toktok long PNG ai helt.

PNG Ai Ke, Fred Hollows Faundesesen Nu Silan na John Farmer i toktok long ol kain kain hevi bilong ai helt long PNG. Drew Keys, PNG Eye Care Jeneral Menesat i toktok long ol helpim bilong Lions long PNG na Dokta Garap i toktok long sik Trachoma i stap long 6-pela distrik long PNG.

Jeneral Asembli i save kamap long IAPB long olgeta 4-pela yia. Moa long wan tausen deliget na ol bikman bilong politik na pablik helt i save kamap tu wantaim ol.

Namba 11 Jeneral Asembli bai kamap long Auckland, NZ long 2020.

# Strit Ministri i helpim ol setelmen pikinini

Veronica Hatutasi  
i raitim

**STRIT Ministri bilong Pot Mosbi Katolik Asdaiosis i wok long helpim sampela pikinini insait long ol setelmen long Mosbi long save long rit na rait, ol laip-skil o skulim ol ol samt-ing we bai helpim ol long sindaun na laip, gutpela pasin long kamap ol gutpela manmeri insait long famili, komyuniti na kantri.**

Tupela Katolik Sister em Sister Tresa Jose na Sister Jeanne-Adeline em tupela husat i go pas long Strit Ministri.

Wantok Niuspepa i bin stori wantaim Sister Tresa na Adeline na givim stori bilong dispela ministri i wok long helpim ol pikinini insait long siti i wok long raun nabaut, no gat skul bilong ol, na sampela i wokim ol kain trabel.

Nau Kardinel Sir John Ribat, Asbisop bilong Pot Mosbi Asdaiosis i bin statim Strit Ministri na tupela Sister wantaim helpim bilong tripela volantia tisa i ranim program bilong ministri.

Nau i gat samt-ing olsem pikinini i gat namel long 8 na 14 kris-mas i stap insait long Strit Ministri program long tripela senta, Loretto Boroko, Sen Mary's Katitdrel long taun na long Sen Peter's Erima.

Bikos i no gat gutpela ples bilong holim program long Sen Peters Erima, ol i no ranim program long hap nau.

Olgeta yia, samt-ing olsem 20 nupela sumatin i save kam insait long program, tasol taim yia i ran, sampela i save luslain.

Bikpela samt-ing nau em long ministri i mas gat opis stret bilong long ranim program.

"Ministri ya em i dri-man bilong Kardinel taim em i stap bisop na mipela i bin kirapim long 2010.

"Olsem na Asdaiosis i bin kisim Sister Marilyn, wanpela Daughters of Wisdom kongrigesen Sister long helpim statim Ministri bikos em i gat save long dispela wok long kantri bilong em,"

Sister Adeline, bilong kantri Madagascar long



Ol liklik pikinini na ol Sen Joseph Katolik Koles sumatin husat i bin givim taim long skulim ol Strit Ministri pikinini.

Afrika, i tok.

Ministri i givim kaikai, gat ples bilong waswas na skul long ol strit pikinini. Taim ol pikinini i pinisim literesi program skul, mipela i painim spes bilong ol long ol praimer skul insait long siti. Em ol skul olsem Sen Teresa Badili, Sen Francis Koki, Bavaroko, Kaugere, Coronation, Sen Peters Erima na Holy Rosary.

Sister Adeline i tok Bisop i bin kirapim dispela ministri long helpim ol tarangu pikinini.

"Ol dispela pikinini inap long stap long skul, tasol bikos ol papamama i no gat wok na i no sapatim ol gut, ol i stap raun nating na i no skul, no gat lans na bas fe mani. Plant i kam long ol setelmen olsem long Is Boroko (miks hailans s e t e l m e n), Kilakila/Sabama, ol Goilala long Rabiagini na Badili setelmen na Ranuguri Hill setelmen,"

Sister Adeline i tok. Wol Visen i helpim ol wantaim trening na givim ol tripela volantia tisa na ministri i luksave long Wol Visen long gutpela helpim na wok bung wantaim ol.

Strit Ministri i save kisim kaikai na klos donesen i kam long sampela kampani olsem TST, Seeto Kui, City Pharmacy, Lae Biskit kampani we i save givim 4-pela beg biskit long olgeta tupela wik, na sampela famili we ol Sister i save putim askim pas i go long ol.

Kar we Strit Ministri i yusim em Roteri Klap long Mosbi i bin givim i

go long ol long yia 2011, na Ministri i givim bikpela luksave tu long ol.

Pot Mosbi Asdaiosis i helpim ol wantaim fiul bilong kar na tu, opis spes long Boroko senta.

Long ol literesi klas we Strit Ministri i givim, ol i lainim long rit na rait, mets, Inglis, rilijen na humen developmen. Ol i lainim tu haijin, kaikai, klos na we bilong stap klin na lukautim gut ol yet long stap helti na klin. Ol i save gat klas long 4-pela de, Mande inap long Fonde stat long 8 klok moning na pinis long belo, na ol Sister i save go lukim ol praimer skul long sekap long ol pikinini we ol i putim ol long en.

"Visen na tingting bilong mipela em long ol pikinini i painim gutpela taim bihain na long inapim dispela, mipela i laikim ol papamama i wok wantaim mipela,"

tupela Sister Tresa na Adeline i tok. Ministri i skulim ol pikinini Yoga na i gat yoga klas.

"Bikpela salens mipela i gat em long spes na pemenen hap bilong skul na opis bilong Strit Ministri skul.

"Pemenen spes i ken helpim mipela gut long ranim ol klas, kukim ol kaikai bilong ol pikinini na toilet na ples bilong waswas bilong ol pikinini. Nau tupela senta long Erima na long dauntaun Mosbi i pas bikos i no gat spes o ples long operet long en.

"Mipela i laik wok wantaim moa meri, tasol no gat spes na

olsem hevi i kamap.

"Olgeta yia, mipela i save gat samt-ing olsem 200 pikinini long program, tasol sampela i save lus taim ol mun i go.

"Olsem driman bilong em na dispela ministri i kirap, Kardinel Ribat i save stap long stat bilong yia taim skul i stat, na long pinis bilong skul yia wantaim,"

Sister Tresa na Adeline i tok.

## Glasm bilong ol sumatin long Strit Ministri skul

Hia em stori bilong Xanthe Wailoni, wanpela sumatin long Sen Joseph Intenesenel Katolik Kolis husat i bin mekim wok long Strit Ministri skul long Boroko.

LONG taim bilong Jisas, em i save lukautim ol tarangu man na meri.

Yumi ol Kristen manmeri mas soim wankain pasin Jisas i bin wokim. I no olsem yumi mas helpim olgeta manmeri, no gat, wanpela tasol inap long mekim bikpela senis.

Wanpela wok mipela ol sumatin bilong Sen Joseph i wokim long Rilijes Edukesen klas bilong mipela em long helpim ol tarangu pikinini long Strit Ministri.

Mipela i pilai wantaim ol, skulim ol long rit na rait, singsing wantaim ol na givim kaikai long ol.

Plant i pikinini long dispela kantri i no gat gutpela sindaun.

Mipela i bin helpim ol dispela pikinini. Liklik lain tasol i stap long dispela ministri skul taim plant ii stap nabaut yet insait long komyuniti na

sosaiti.

Plant i ol dispela pikinini i nogat gutpela papa na mama, ol i no save kaikai gut, na sampela we krismas bilong ol i 10 na antap i no save long rit na rait.

Taim ol i kamap yangpela manmeri, sampela i save kisim drag, dring bia, na sampela ol meri save marit taim ol i yanpela yet na ol i bel.

Mipela i bin luksave olsem wanpela samt-ing i no wankain, na dispela em, mipela i gat gutpela sapot na edukesen na ol i no gat.

Taim mipela i skulim ol na askim ol wanem samt-ing ol i laik kamap, sampela i tok ol i laik kamap pilot na dokta. Taim mipela i harim dispela, mipela i wari nogut tru bikos ol i nogat gutpela edukesen long helpim ol na ol bai gat gutpela sindaun.

Tasol wanplea sampela samt-ing mipela i bin laikim stret long ol dispela pikinini i amamas tru long lainim ol samt-ing mipela i bin skulim ol long en. Mi i bin lukim osem ol i gat bikpela save na sapos ol i gat sans, ol i ken inapim ol driman bilong ol.

Dispela ol pikinini i helpim mipela gut tru.

Ol i opim ai bilong mipela long luksave long ol blesing yumi gat long en. Plant i taim, yumi i no luksave long planti ol gutpela samt-ing long laip bilong yumi olsem ol papa na mama bilong yumi, ol tisa husat i save lainim yumi, ol gutpela kaikai na klos na planti ol narapela samt-ing.

Tasol bungim ol dispela pikinini i senisim rot we yumi i save lukim ol samt-ing. Em i mekim mipela i kamap gutpela moa. Nau mipela i luksave long ol blesing long laip bilong mipela na em i mekim mipela i wok hat long skul.

Sapos yu gat gutpela papa na mama, gutpe tisa na gutpela skul, i moabeta long lukim olsem ol i bikpela blesing na bikpela sans long stretim sindaun bilong bihain taim.

Mipela i amamas tru long helpim ol dispela pikinini. Bihain taim, mipela i laik helpim ol planti narapela pikinini i no gat gutpela sindaun.



## BARUNI DAM

LONG Sarere, 22 Oktoba 2016, mi bin wokim Santu Misa long Baruni Dam.

Siks-pela yoa i go pinis, mi stap lukautim St. Michael Peris Hanuabada, tasol mi no save go long Baruni Dam.

Mi save go wokim lotu olgeta Sande long Baruni viles na wan wan taim, mi go wokim lotu long Kade, klostu long Baruni Dam.

Long Kade i gat wanpela haus lotu o Sapel. Tasol long Baruni Dam i nogat wanpela haus lotu yet. Mipela wokim lotu namel long wanpela open hap long ples.

Manmeri i stap long Kade i liklik lain tasol. Long Baruni Dam, planti moa moa yet.

Ol lain i stap long Baruni Dam i kam long wanpela lain tasol long Goilala.

Plant i pikinini i stap. Tasol ol i no go long skul. Maski i gat fri edukesen i stap long PNG tasol pikinini i stap nating tasol long ples.

Namba wan wok bilong ol manmeri i stap long Dam – ol i save bungim ol samt-ing kar i save bringim na tromoi long Dam.

Kain kain samt-ing olsem ken bilong dring, botol, na planti samt-ing moa. Ol i wokim haus bilong ol yusim kapa o metiriel ol i save bugim long dam.

Wanpela bikpela wari bilong mi em smok. Ol i stap klostu na pas tru wantaim rabis bilong dam. Paia long dam i no save dai.

Smok na das i save karamapim ples ol i stap long en. Long de na nait ol i stap wantaim smok na das.

I nogat wanpela fres win i kamap. Win i pulap long smok na das tasol.

I nogat wara i stap klostu long ples. Ol i save wokabout long we tru na kisim wara. Olsem na planti pikinini na bikpela manmeri i no save long waswas na kain kain sik i kamap klostu klostu long ol.

Wara bilong dring tu i hat tumas long painim. Olsem wanem, sapos yu no inap dring na nau yu laik waswas? Em bai hat ya!

Taim mi toktok wantaim ol, sapos ol i save kisim helpim bilong Gavman o kisim sevis bilong Gavman? Bekim mi kisim –" I NOGAT WANPELA GAVMAN, MEMBA i wari long mipela. Olsem na mipela yet i bisi long laip bilong mipela.

Bikos mipela i no inap sindaun na wetim Gavman i kam wantaim rais na tinpis? Mipela i bungim ol samt-ing we mipela i save bungim long rabis na sapos inap pinis, mipela i salim long kisim mani".

Narapela man i tok; "Long taim bilong ileksen, planti bai kam painim mipela. Long taim bilong kempen, ol i wokim planti promis. Bihain long ileksen, i nogat wanpela man o i nogat man i winim ileksen i bin kam na selebretim wantaim mipela".

Em i laip bilong brata susa bilong yumi long Baruni Dam. Ol i wankain olsem yumi. God i wokim ol wankain olsem yumi. Tingim ol long prea bilong yu.

Sapos yu laik helpim ol, noken go long yu yet. Kam lukim mipela (Charity Sisters) long Hanuabada, bai yumi makim taim wantaim ol na yumi go wantaim.

Sapos yumi makim taim pastaim, Ol i bai kam bung na wetim yumi. Sapos yumi i no makim taim, yumi bai i no painim ol.

Ol i bai stap namel long rabis painim samt-ing long hap.

# Mani bilong 2017 baset i mas kamap long taim

**GAVMAN** i tokaut long K12.9 bilien baset bilong 2017 long dispela wik Tunde. Dispela mak bilong mani i daunbilo long mak bilong las yia, tasol gavman i bilip bai em inap long mekim ol wok bilong kantri long dispela mani.

Gavman i putim sampela ol liklik han dipatmen husat i save kisim mani bilong ol yet, aninit long ol bikpela diptmen. Ol dispela opis i wok long mekim wankain wok ol arapela dipatmen i mekim nau olsem na em i gutpela long putim ol aninit long ol narapela dipatmen na sevim mani bilong kantri.


Ol provins i kisim bikpela skel tru, K3.6 bilien long mekim wok bilong ol. Helt i kisim K1.22 bilien na Edukesen i kisim K1.16 bilien, Lo na Oda i kisim K1.12 bilien. Mak bilong mani ol dispela sekta i kisim em i antap tru, bikos i abrusim milien na i go painim mak bilong bilien kina nau.

I gutpela olsem gavman i givim bikpela mani long helt, edukesen na lo na oda. Ol dispela dipatmen i mekim wok bilong lukautim sindaun bilong pipel. Helt i lukautim ol haus sik na helt senta. Edukesen i lukautim ol skul na givim save long ol pikinini. Lo na Oda i karamapim wok bilong ol polis, ol kot na CS na em tu i mekim bikpela wok.

Dispela nius bilong mani gavman bai yusim long ranim ol wok bilong en na mani em i bilip bai

Er..boss, tromoi bia na smuk go insait..em bai swit yah!

Em nau..smel bilong sup bai kirapim ol man..



kisim long 2017 em tupela bikpela samting. Olsem na long taim ol memba bilong Palamen i bung long dispela baset sesen, yumi hop bai gat gutpela dibeit i kamap namel long ol memba. I gat gutpela namba bilong ol Oposisen memba nau na ol i mas yusim dispela sans long askim ol kwesten long 2017 mani plen bi-

long gavman.

Wanpel bikpela askim em long wanem taim mani bai i go aut long mekim ol wok. Planti taim mani i no save kam hariap na ol dipatmen olsem edukesen, i save kisim taim stret.

Ol skul i gat wanpela moa mun bipo long skul yia i pinis tasol i gat komplek i kam long ol prinsipal

olsem ol i no kisim olgeta tuisen fi fri edukesen mani gavman i bin promis long givim long 2016. Planti skul i salim ol gret 10 na 12 studen i go bihain long ol i pinisim eksam na ol i laik pasim skul yia hariap. Ol i tok long begin bilong skul yia long 2017 bai ol i sot yet long mani.

Narapela bikpela askim i go

long mani bilong transpot na infrastraksa o ol rot na bris na ples balus na bikpela bris bilong ol sip. Dispela sekta i kisim bikpela mani tru - K897.2milien. Dispela mani i bilong ol projek long nesene level, bikos ol provins i mas yusim mani bilong ol long stretim ol han rot na ol arapela liklik wok.

Dispela mani bai i go long ol rot na bris na ples balus long ol bikpela taun tasol o bai i go tu long ol ples longwe long taun?

Ol pipel long ol ples longwe i nidim gutpela bris na ples balus we ol liklik bot na balus i ken karim ol yet wantaim kago bilong ol olsem kopi na kakau i go salim long taun na i ken mekim laip bilong ol pablik sevan na ol manmeri nating, i kamap isi liklik.

Long las 5-pela yia, yumi lukim bikpela mani tru i go insait long sanapim ol bikpela rot na bris na ples balus long Lae, Pot Mosbi, Hagen, Rabaul, Madang na long Hailans Haiwe. Ating nau em i taim bilong putim ol liklik taun tu i go insait long dispela program we ol egrikalsa bisnis i stap.

Wanpela gutpela piksa em Morobe provins, we moa pipel i wok long kamapim kopi bisnis nau tasol ol i no gat rot long karim i go salim long Lae. Sapos yumi putim mani i go long ol dispela eria tude, bai i gat gutpela kaikai. Dispela invesmen long ol egrikalsa eria bai i gat gutpela bekim bilong bihain taim.

## Lukautim laip bilong yu



PLANTI bilong mipela i no save wanem samting em helt o seifti inap long mipela i bungim sampela hevi long laip.

Moa yet planti bilong mipela i no save wanem samting i laip inap long taim samting i kamap long mipela.

Kain sindaun i stap o i bin kamap long mipela long sampela taim.

Wanpela meri i tok em i no bin save wanem samting i laip inap long taim mama bilong em i dai. Dispela long taim em i liklik yet.

Em i no inap long klia gut na askim sapos em i isi long save olsem wanpela i ken stap laip long wanpela taim na liklik taim i no moa stap.

Em i no inap long lukim, tasim, toktok wantaim na harim nek bilong mama bilong em gen.

Olsem asde em i bin save mama bilong em bai stap oltaim wantaim em, long

sapotim em. Tasol tude kirap nogut mama bilong em i no moa stap.

Wankain olsem ol stori i kamap long Tsunami o bikpela tait we i kamap long Aitape long 1998 we i kilim inap olsem 2000 manmeri na pikinini.

Wanpela man long dispela hap i tok bipo long tait i kamap, em i bin amamas gut wantaim famili. Tasol bihain liklik long sampela aua planti bilong dispela lain husat em i amamas wantaim i no moa stap.

Tait i kisim em i go na tromoi em long wanpela hap

long bus we bihain em i painim rot na bungim gen tasol liklik hap famili we i stap laip yet.

Laip bilong man em olsem, wanpela taim em stap na narapela taim em i no inap moa stap.

Long dispela mipela mas oltaim lukautim laip em mipela i gat long em. Mipela i no save wanem taim dispela laip bai lus.

Long stap gut na helti mipela i mas lukautim bodi, tingting na spirit bilong mipela.

Wol Helt Oganaisesen i tok: Helt i min gutpela stap bilong bodi, tingting na sosel na i no min tasol long taim wanpela i gat sik (1948).

Sapos wanpela bilong mipela i dai, mipela bai stap wantaim wari. Em olsem mipela i gat hevi long tingting. Sapos wari i bikpela dispela i ken mekim mipela i go longlong. Mipela i no inap

tingting gut na stap olsem man.

Long wankain wei mipela i save lukautim bodi mipela i mas lukautim tingting na spirit wantaim.

Wanpela saveman bilong Ingran long 1600s, William Shakespeare i tok: "Bodi bilong mipela em gaden na tingting bilong mipela em ol papa bilong gaden." Bodi i stap long wei tingting i laikim long em

Long sapotim kain ol tingting Papua Niugini Olimpik Komiti long wan wan yia i save holim Helti Laipstail wokabaut.

Dispela wokabaut em bilong tokim manmeri olsem taim ol i stap ol i mas ekksesais long strongim bodi na tingting.

Gavana bilong Nesene Kapitel Distrik Powes Parkop i save promotim dispela tingting tu taim em wantaim lain bilong em i ekksesais na wokabaut long olgeta Sande moning.

# Tok bilong God senisim laipstail long Daunagari

James G. Kila i raitim

**GUTPELA** senis tru i wok long kamap nau long Daunagari viles arere long Ramu riva long Usino-Bundi distrik long Madang provins, bihain long wanpela Kristen sios kruseid.

Pastaim long mun Ogas, dispela viles komyuniti save lukim kain kain pasin we ol yut o yangpela man i save mekim olsem dring hombru na smok mariwana.

Paia na lait bilong Holi Spirit i kamapim bikpela senis tru nau long dispela komyuniti na sampela naispela senis i kamap tude. Planti manmeri yangpela na lapun tude i stap wantaim amamas na bel isi bikos lotu nau i opim tingting bilong ol na ol i save nau olsem Papa God i stap, na yumi man na meri na pikinini i stap. Olsem na yumi mas lotu long em na pret long em na soim rispek long wanpela arapela.

Agatha Yombai, husat save wok olsem Komyuniti Afes Opisa long jenda opis bilong Ramu NiCo i bin stori long planti samting we i bin kamap bihain long wanpela Kristen sios kruseid long dispela ples. Dispela kruseid long Daunagari i bin kamap long Ogas 20 i go 26.

Em i stori olsem bihain tasol long dispela kruseid, ol gutpela senis i bin kamap long komyuniti. Ol yangpela man i kukim ol mariwana na tu kukim ol kontena na samting bilong wokim stim o hombru. Moa long en tu ol lain bilong salim buai long rot i stopim dispela pasin na nau ol save salim long tred stua bilong ol tasol. Dispela em wanpela gutpela senis tru we pawa bilong lotu na Papa God i kamapim long Daunagari komyuniti.

Agatha yet i bin kamap wantaim dispela tingting long kamapim kruseid na i bin askim kampani bilong em long helpim, tasol ol lain long Ramu NiCo Kurumbukari Main sait i helpim em wantaim K2000 na ol arapela lenona kontrak kampani Raibus Sekuriti Sevises i givim K300 na Raibus Enjiniaring Limited (REL) i givim narapela K300.

“Mi ranim dispela kruseid wantaim K2,600, na fest taim tru mi bin tingting planti stret, tasol mi no tingting planti long pawabilong God.

“Dispela kruseid o wok program mi plen long kamapim em long givim glori long God na blesing na helpim i ken kam long laik bilong Papa God yet,” Agatha i tok.



Ol lokal lida long Daunagari i daunim het long beten long kruseid.



Wanpela pasto i serim tok bilong God long kruseid.

## Mirakel bilong net kisim planti pis

Em i tok olsem wantaim mani em i holim em i bin baim wanpela net na givim ol yut long go long Ramu wara long kisim pis long ol lain pastor i kam bai kaikai.

Agatha i tok olsem namba wan taim tru ol yut i go tromoi net ol i kisim 23 pis. Long narapela de gen ol yut i go tromoi net, ol i kisim 200 na 300 long wokim kaikai bilong ol

pasto long kruseid.

Em i tok olsem long las de bilong kruseid long taim bilong pasim kibung, ol yut bilong Daunagari i go tromoi net long Ramu wara, na dispela taim ol i kisim 3,000 pis. Sampela long ol pis ya em traipela silva kap na ol arapela pis bilong wara. Dispela taim planti ol Kristen lain long kruseid i tokaut olsem pawa na spirit bilong God i kamapim mirakel stret.

Agatha i tok bikpela tenkyu stret long planti lain bilong ples Dauna-



Meri husat i go pas long kruseid Agatha Yombai sanap namel long ol pasto husat i stap long kruseid.

gari, husat i givim helpim wantaim kaikai bilong gaden na ol prut na ol arapela samting long taim bilong Kruseid.

“Ol pipel yet i givim samting long laik bilong ol yet. Sampela Kristen i kilim pik na givim na sampela bringim ol gaden kaikai na tru tumas kruseid i ran orait stret na no gat samting i sot na mi givim bikpela tenkyu na biknem i go long Papa God,” Agatha i tok.

Agatha i kamapim dispela kruseid projek long bringim gutpela sindaun insait long Daunagari viles we ol manmeri i ken bilip na lotu long God na senisim pasin na wok strong long graun na lukim divelopmen i kamap long eria bilong ol.

Ol lain pasto bilong Wau i bin go stap long dispela wan wik kruseid na autim tok bilong God na givim strongpela salens long ol pipel bilong Daunagari na ol ples klostu.

Planti Kristen manmeri i tokaut

olsem bikpela mirakel na senis i bin kamap bihain tasol long dispela kruseid long Daunagari.

Wan tausen pipel i bin bung long dispela kruseid na long harim tok bilong Baibel em ol pasto bilong Kavanen Famili Felosip bilong Wau long Morobe provins i go pas long en. Dispela Kristen ministri grup em ol lain papagraun bilong Morobe maining olsem ol lain long Hidden Veli i save yusim ol long beten na kamapim felosip long taim i gat hevi namel long ol papagraun na ol nidim helpim na painim wanbel pasin. Ol pasto bilong CFF i bilong olgeta hap bilong Hailens rijon na ol i givim gutpela ol skul toktok stret long dispela kruseid long Daunagari.

Ol pipel i amamas long lotu na singsing na harim ol gutpela tok bilong Papa God na ol pipel yet i plen long kamapim wanpela kruseid bilong ol yet long mun Februari 2017.

# Ol lain Korea antim gutnius long Sepik

Maureen Gerawa i raitim

**WANPELA** man i save driman long lukim ples bilong em i kamap gut na dispela driman i wok long karim kaikai isi, isi tasol em i kamap wantaim planti prea na sakraifais long laip bilong em yet.

Mathew Bai i save stap long Pot Mosbi, tasol tupela wik i go pinis, meri bilong en i kisim sampela lain Kristen bilong Korea i go long ples bilong em na stap tripela de long autim Tok bilong God na givim sampela helpim bilong wok marimari olsem marasin, na lukim ol siklain samting.

Faivpela yia i go pinis taim ol dispela Korea misin lain i bin wokabaut i go long ples bilong Mathew insait long tripela de, tasol nau MAF balus i sotim lek bilong ol bikos em i kisim ol long balus long Wewak ples balus i go long wanpela liklik ples balus klostu long ples.

Mista Bai i bilip tru olsem Gutnius i mas kamap ples klia long ai bilong ol pipel olsem na em i kirapim wanpela trening senta bilong ol pipel we ol inap long kam bung long lainim ol laip skil long senisim laip bilong ol yet na wantaim patnasip bilong em wantaim ol Kristen misin grup bilong Korea, em i bilip olsem planti moa gutpela samting bai kamap long ples bilong em.

Long taim ol lain Korea i go long ples Yagaip, ol i holim bung wantaim ol lida bilong ol kain kain sios i stap long hap na ol i kamapim wanbel long kirapim ol bod na long menesim ol skul insait long dispela hap. Planti skul long hap i wok long painim hat bikos i no gat sapot i kam long gavman.

Tupela pasto i go pas long ol Korea misin tim na tupela i bilong tupela sios long Korea. Wanpela bilong tupela em Bang Choon He, husat i lida bilong Big Grace sios. Dispela em i namba tu taim em i kam wantaim grup long PNG na em i memba bilong sios autris ministri bilong sios bilong en long PNG, Saina, Myanmar na Yunaitet Stets.

“Mipela i gat bikpela wari long ol pipel bilong mi. Ol i stap yet long pret bilong sanguma, poisen, pret long ol spiriti bilong daiman, na lotuim ol giaman god olsem na ol bai i no inap long stretim ol yet na mekim ol wok olsem ol kopretiv,” Mista Bai i tok.

“Mipela i laikim ol i mas lusim ol dispela kain bilip na ol bai inap long putim han long ol wok developmen i kamap. Papua Niugini i wok long senis na sapos ol i stap yet long wankain bilip bilong bipo, ol bai stap bihain,” em i tok.

Pot Mosbi Rainbow Kristen Skul we Mista Bai i lukautim bai kamap fokol poin bilong trenim ol lokal pipel long kamap tisa bilong ol elementri skul long ples bilong em bikos ol tisa i hat long go long ples bilong em. Em i painim pinis tupela man long trenim ol long neks wik.

Ol sumatin na tisa i bungim ol sponsa bilong Korea.



Ol sumatin wantaim ol komyuniti i sindaun wantaim ol misineri visita bilong Korea long harim toktok.

Ol pikinini i sanap long lain na kisim ol T-siot bilong ol long meri pasto bilong Korea misin grup. Sampela pasto na memba bilong grup i sanap namel long ol pikinini na komyuniti.

Toro



Biabia



Kanage



Teks i kam long 71845906

Dia Edita, mi man bilong baim Wantok Niuspepa olgeta wik long wanem, mi no nap ritim Inglis Niuspepa. Mi man bilong Tok Pisin tasol. Wanpela bikpela wari mi gat long en em Tok Pisin na Motu nius long olgeta 6 klok na 9 klok. Mi laik harim na mi save wet i stap na nogat, ol i ritim nius tasol long Inglis na mi no inap long save ol i toktok long wanem, olsem na mi autim wari bilong mi. i no mi tasol, yu husat save gat wari olsem mi, yu ken rait i kam long Wantok Nius na sapot, em tasol na tenkyu.

Wapu MK Pot Mosbi, NCD

Dia Edita, Long lukluk bilong planti, i luk olsem ol lain i kam long wanpela rijon i wok long bagarapim kapitel sitim bilong yumi, Mosbi siti, wantaim ol pipia na mi wari long dispel na autim tingting bilong mi. Pipia bilong buai na buai spet buai i bagarapim tru Pot Mosbi siti, moa yet ol pablik ples olsem ol bas stop, ol fran bilong ol stua na ol arapela hap moa olsem Gordons maket na bas stop.

Mi lukim ol lain i no rispektim olsem Mosbi em i bikpela siti bilong kantri.

Yu ken lukim klia wan olsem i no ol nambis manmeri i mekim. Em ol hailans lain i bagarapim siti.

Ol polis man meri bilong yumi i hatwok tru na ol i ranim ol i go, na long narapela sait ol kam bek ken olsem blu lang na ol givim het pen tru long ol gutpela polis manmeri bilong yumi long dispela siti.

Olsem na mi laik tok olsem, ol dispela kain lain i bagarapim nem bilong planti ol gutpela manmeri bilong hailans i stap.

I gat 7-pela provins long hailans na wanem provins tru i wok long bagarapim siti stap, orait, ilektet memba na provinsal gavana i mas bungim ol na kism ol i go long ples bilong ol. Mekim olsem na yumi bai lukim siti i stap gut.

Em tasol na yu husat laik sapot o egansim mi, rait i kam long Wantok Nius. Tenkyu...

Wilson, Pom NCD

Ol meri i karim gutpela samting long bel

Frieda Sila Kana i raitim

Wanpela meri evanjelis bilong Australia, Maggie Robinson wantaim man bilong en Glen na narapela evanjelis pasto meri bilong Nu Silan, Tina Vaka i bin kam long Pot Mosbi long las wik na holim tupela de bung bilong ol meri long Pot Mosbi na Sentral Provins.

Dispela bung we i bin kamap insait long Tabenakel ov Prea haus lotu long Siks Mail em i wanpela lotu bung bilong kirapim tingting bilong ol meri long luksave long wanem as ol i bin kamap long graun na long wanem kain wok ol inap long mekim.

Dispela tupela pawa meri, Maggie na Tina i sanap holim han wantaim long tokim ol mama we namba i winim 200 long tupela de, olsem God i bin gat plen taim em i bin kamapim



Olgeta mama i kam bung long Tabenakel ov Prea, Asembli ov God sios long Siks Mail.

Poto: Glen Robinson meri. Em i no bin kirap nogut na wokim meri, o em i no olsem bilong helpim man tasol na God i kamapim meri. Nogat.

“Eva em i gat nem olsem meri. Olsem na taim em i bin kaikai prut na brukim lo bilong God long gaden paradais, olgeta manmeri long graun i bin kism dispela hevi na i pundaun long sin,” Pasto Tina i tok.

Pasto Tina i strongim tok

bilong en long tok bilong God i stap long Buk Song 139:14, “Mi pret long yu, olsem na mi save litimapim nem bilong yu. Olgeta samting yu wokim i narakain na i nambawan tru. Mi save gut long dispela samting na mi pilim tru.”

Em i tok God em i mekim ol meri gut tru bihainim plen bilong em yet na wok bilong yumi long graun em long yumi bai stap olsem ol meri

na i no narapela samting. God i no kamapim wanpela samting namel long man na meri, nogat. Em i mekim man na meri olsem tok i stap long Buk Stat.

Pasto Tina Robinson husat i bin go pas long dispela kibung i tokim ol meri olsem dispela nesen em i stap insait long bilum bilong bebi insait long bel bilong yupela ol mama bilong PNG. “God bai mekim dispela

samting insait long yupela long kamaut,” Pasto Tina i tok.

“Yupela i karim dispela nesen insait long bel bilong yupela. Yupela i mas bihainim gutpela pasin. Yupela i olsem naispela Kumul we i mak bilong dispela kantri. Lusim ol rop long dispela kumul na larim i go het insait long yu,” em i tok.

Long buk Efezis 1:4 buk baibel i tok, God i makim yumi bilong em pas-taim long wol i kamap, long yumi mas stap holi na no gat rong.

Pasto Tina i tokim ol meri long tingting strong na luksave olsem God i makim ol long mekim ol bikpela wok na ol i no ken larim wanpela samting long stopim ol.

“Yumi bai bagarapim graun long gutpela wei. Lusim ol Esther, Deborah i

go long bringim pait na larim ol pipel i go fri long pasin bilong sin na bagarap. Maria i karim Jisas em i kamapim bikpela senis long wol. Olsem na larim ol driman bilong yupela i mas karim kaikai, bikos ol driman i save kam long God,” em i tok.

Dispela tupela Pasto i kam aninit long wanpela muvmen ol i kolim “Women by Design” na ol i save mekim wok long spirit na long helpim bodi sait tu.

Ol i save wok wantaim ol yangpela na ol bikpela meri wantaim ol yut long planti hap bilong ol Pasifik kantri na dispela yia em i namba wan taim ol i kam long Papua Niugini long statim dispela wok.

Nau ol i gat moa long 200 memba long Pot Mosbi na Sentral Provins na ol bai holim wankain bung gen long mun Desemba, 2016.

# STORI BILONG TUMBUNA

## KAPUL LUSIM PINGA



Yumi olgeta i save kilim kapul bilong graun na yumi save lukim wanem samting em i no gat. Yes yumi olgeta i save long em i no gat namba wan pinga. Olsem wanem na i no gat? Mi laik stori long as tru bilong dispela. Stori i go olsem: Long bipo tru wanpela man wantaim meri bilong em i stap long ples Naburume.

Long wanpela taim man ya em i go long bus na painim pikinini diwai. Dispela pikinini diwai em ol pisin i save kaikai. Em i lukim pinis na i wokim haus antap long dispela diwai pinis na em i kam long ples na kisim banara na supsup na i go bek long was long dispela pikinini diwai.

Taim em i go was long pikinini diwai, pes taim, em i painim wanpela wel yam na em i dikim na em i kisim na i pasim long lip bilong kapiak. Em i go kisim kapiak na kaikai bilong kapiak tu na i go klostu long pikinini diwai na i mekim paia na em i kukim kapiak. Kapiak i stap yet long paia na em i goap long diwai i go antap na i go

insait long dispela liklik haus em i wokim.

Na em i was long pikinini diwai i stap na em i tingting long kapiak, nogut kapiak i paia. Olsem na em i kam daun long diwai na i go bilong tanim kapiak. Olsem na man ya i ting, nating paia, i mekim nais na ol kapiak i tanim tanim nabaut. Olsem na em i go antap long diwai gen na was long pikinini diwai. I stap longtaim liklik na em i ting, nogut kapiak i paia. Olsem na em i kam daun gen na i go lukim olsem kapiak i tanim pinis. Ol kapiak i no paia tu.

Olsem na man ya i tingting plantim na em i ting wanem man i tanim kapiak? Em i go antap long diwai gen na i go insait long liklik haus na was long pikinini diwai. Tasol ai bilong em i lukluk i go daun na i was long paia i stap. Na wanpela han i kamap long karamap bilong wel yam, taim em i bin i kam na kukim kapiak na em i lusim wel yam i stap klostu long paia. Na han i kamap long dispela wel yam na i tanim kapiak pinis na i go insait long karamap gen.

Na man ya i kirap nogut tru na i go daun long diwai na i go klostu long paia na em i tok, yu husat man i tanim kapiak bilong mi i stap? Meri naispela moa i kamap long wel yam na em i tok, mi tasol tanim kapiak bilong yu i stap. Mi meri bilong yu. Na yu-pela i ting wanem man ya i kaikai kapiak? Nogat! Em i sek-sek nogut tru long dispela meri long wanem em i winim olupela meri bilong em.

Na meri i tokim man, mi as bilong kapul. Na tupela i go na meri i tokim man, yu i go lukim as bilong dispela diwai. Na man i bihainim maus bilong meri i go lukim samting olsem 10-pela kapul i stap long wanpela as bilong diwai. Na man i kisim kapul na meri tu i go long ples na i tokim olupela meri bilong em long samting em i bin mekim i go na painim dispela meri.

Olsem na olupela meri wantaim olupela meri tupela i stap gut tru.

Na meri i olsem dok. Em na man bilong em i go long bus, bai meri i kamapim planti kapul, meri i save tokim man bilong em, dispela em ol lain bilong mi yu no kilim. Na ol man i save lusim. Olsem na ol i no save lus long abus, oltaim ol i save kaikai abus.

Na ol i stap hepi tru, na wanpela taim wanpela ples, ol i singautim man ya long i go na singsing. Man i tokim nupela meri, yu olsem wanem, yu bilas tu na yumi i go singsing. Na meri i tok, mi no laik. Bai mi bosim haus i stap. Yu wantaim olupela meri bilong yu, yutu-pela i go singsing.

Tupela i singsing pinis, i tulait nau tupela i kam. Na man i kam kamap na meri ya stat long ranawe. Na man i lukim olsem na i lusim kundu na i bihainim meri ya. Tasol man i tulet. Em i no inap long holim em. Na meri i go na goap long wanpela bikpela diwai na man i bihainim em. Tasol meri i go insait long hul bilong diwai na man i holim namba wan pinga long lek bilong meri. Tasol ol mama ol lain bilong meri i strong na ol i pulim em i go insait. Na man i brukim namba wan pinga bilong meri tasol.

Na man i krai nogut tru na i singaut. Tasol ol i bekim tok bilong em; mipela givim yu gutpela meri bilong givim abus. Tasol yu i no laik olsem na mipela no ken givim yu moa. Yu yet wok hat na painim abus na yu kaikai. Olsem na man ya i krai, krai na raunim as bilong dispela diwai i go, i go na i no inap na i lusim i kam bek long ples.

Olsem na nau yu kilim wanpela kapul long ston na yu ken lukim namba wan pinga bilong lek blong em ol i katim pinis na i kamap sot-pela. Em tasol stori bilong mi go olsem.

Mista Urim S. Madang

# PAINIM WOD PILAI

Ol wod lista:

BARIT

TESIN

KAIKAIM

FAIL

VANIS

BIHAIN

KRISMAS

HAIDEN

SAMAPIM

DRAIBISKET

NEKS

KALKALAP

URUAI

GRISMAN

PASIM

OFISA

WANEM

HIPIM

WETIM

RAUNWIN

PRETIM

PISIN

AITAN

SANDAVEL

NABIS

SWETIM

Ansa bilong Wod Pilai isu 2198

O D P R Z C P I T C F O E E O D L V O A L D S A B  
L D A R G F V N P S A O G J Y E E D H L A I U K D  
F M S S U R B M A C I P M E U S D Z S C N N K T I  
P A I K E N I G N T L T B E H R E N T S A E P K Z  
T M M K R P E S E N R N B R M B B P E E F M A N E  
O F I S A I T K M Y A N E I I R P L S Q O C T E H  
R B S M E I S E S A U B T L T B F R J M K I K M V  
O W A S F I K M P E N E I J N S X J O E F S O K E  
R S N I B O I A A B W I Z S J K N M S G V Z M S E  
V B D I T X R T I S I A A Q C I A U T Y D A E N D  
M K A L K A L A P M N H N I S E W X E Y E I L Z P  
L R V R Z P N L R G S Y A E E R D D Y F D E A D Z  
D T E I I E I S E S N U T I M X A K A Z N S E R E  
T F L R D T C S T I R F X S N R K Z O G V T B S P  
V A N I S E R Y I U T T Z H T O I A I H T E R F M  
R J A E T R J E M N T E V N U R H D A H K E K K F  
C H I P I M J N A O E R M E G K A E B J N G M E P  
S S L R E E T H W S I D B S D G E O I I T H C M E  
L L P O H D T U W H C E T E L A B N C R H P Z D E  
L T V G P D A T P C E M P V V H B S G D E J D I F

P S H P S N I O F M S D N H X E T D C A E H E J R  
T V R C H P K N T T G P B E A E G E D N N G E S L  
A A O Z W T S O N D O N C A F E A Y E M E G F B I  
A E N D E E B L K T U F I E R D W B E O S G E R S  
T H R E Z L O F H E H O Z T N S O M Z L T R A R I  
H A G H A B N L P M R A R H R E R I K L I K L I H  
S O A G N U S Y A B F U P U S A O S A K O N V Z R  
E N D A T I P T I A E R A I F E L M R A L A P K D  
W S S U T N M A P L Y L T M M C B P U L H A N J L  
C L I A G R A M A B U O I A S W I S K B M P K H A  
V O D A K N D M U A P P I N N A K G A Q A R L A N  
C D A I N Y O H L L E A G S D T M R D B T V T R V  
E M H X M D S O A G L A S P D A A T X I E S N V R  
S D N L F H L V I U A F O O W U N I E L U Z Q R  
O U N L G Y I F J W M G N T L K N N I N C E E M E  
O P U O E A T G G G G A I O T B T F K M G C L N T  
A S H G F Z P M O J N A S I S E E O E A L E C S S  
N H E W S P G I O T R U I M W I N P B R M H S Q I  
E I T D E G R C B K F H S A N D E L C A A A N A I  
L L U M D A Q T M P F D H I P O D Z N E M O E M L



# Bikpela guria moa i kamap long Itali



Klok long 16 senturi bel taua i stop long 3.36am long taim guria i kamap long Amatrice.

**PRAIM** Minista Matteo Renzi bilong Itali i tok kantri i mas stretim gen ol taun na viles long Sentrl Itali em bikpela guria inap long mak bilong 6.6 i bin bagarapim long Sande moning.

Dispela guria i bikpela tru long Itali bihain long 1980. Guria i bin kamap long Marche na Umbria sampela de bihain long tupela arapela guria i bin kamap.

Planti ol pipel i pret na ranawe bihain long ol bikpela haus na San Benedetto haus lotu long Norcia i bruk i go daun long graun.

“Bai mipela i sanapim bek olgeta samting – ol haus, sios, ol stua. Dispela ol hap em ol naispela ples,” tru Praim Minista Renzi i tok.

Namel bilong dispela guria i stap 68 kilomita saut-wes long Perguia na klostu long Norcia taun.

i no gat ripot bilong wanpela man i dai long dispela guria long Sande. Strong bilong dispela guia i winim bikpela guria bilong 2009 i bin kamap long L’Aquila na kilim 300 pipel.

Sampela pipel i bin kisim bagarap na wanpela i gat bikpela bagarap tru. Ol imejensi sevis i bin pulim tripela pipel i kamaut long hap we ol haus i bruk i go daun long Tolentino, wanpela taun long Marche. Olgeta bikpela rot i pas bihain long ol bikpela ston i pundaun i kam long ol maunten na blokim rot.

Ol i askim ol hotel long givim 5,000 bet long ol pipel husat i kisim taim long dispela guria. Tasol ol i ting moa pipel bai nidim ples bilong slip.

Ol guria long Itali long mun Ogas na long dispela wik i

givim bikpela hevi tru long 14,000 pipel. I no bin gat planti pipel i dai bikos ol manmeri i bin lusim ol haus bilong ol bihain long bikpela guria i bin kamap long Trinde. Palnti bilong ol dispela haus tu i no bin kisim tok orait long ol famili i muv i go bek long ol olsem na i no gat ol pipel long taim dispela guria i bin kamap long Sande.

Klostu bai winta i kamap na ples bai kol tru olsem na ol i wari long painim ples we ol dispela pipel i ken go stap.

I tru olsem i no gat planti pipel i kisim bagrap, tasol ol i wari tru bikos dispela guria i bagarap planti ol olupela haus na haus lotu i gat stori long en. Wanpela bilong ol em bikpela haus lotu bilong San Benedetto long Norcia. Ol i bin sanapim dispela haus lotu long 14 senturi long luk-save long petron santu bi-

long Yurop, Sen Benedict. Dispela guria i bin bagarapim tu klok taua na Sen Augustine sios long Amatrice.

Ol Benedictine monk long Norcia i bin salim nius bilong bikpela bagarap long haus lotu. Ol i tok ol i orait bikos ol i bin lusim monasteri bilong ol long mun Ogas bihain long bikpela guria i bin kamap long Amatrice.

Ol i bin pilim dispela guria tu long Rom na long sotpela taim ol i stopim ol tren i save ran aninit long graun. Ol i pasim bikpela haus lotu bilong St Paul Outside the Wall bihain long sampela hap plasta bilong wol i lus i go daun. Bihain long ol save-lain i sekap, ol i bin opim gen dispela haus lotu.

Long Vatiken, ol paiaman i bin sekap long St Peter Basilika na ol arapela sios i stap klostu.

## PNG gavman i defenden kot keis bilong ol Manus refuji

**Sam Seke iraitim**

LOYA husat i go pas long makim ol refuji na asailam sika long Manus Ailan, Ben Lomai i tok Stet bilong Papua Niugini (PNG) tasol bai i difenden long nupela keis ol bai bringim long Suprim Kot.

Long Fonde las wik, Suprim Kot i bin rijektim eplikesen bilong Mista Lomai long teknikel hevi long makim moa long 800 refuji na asailam sika long Manus Ailan.

Tasol em i tok ol bai mekim nupela eplikesen gen

long makim ol dispela lain, aninit long Epril disisen bilong Suprim Kot we i tok pinis olsem em i rong long kalabusim ol long Manus.

Mista Lomai i tok aninit long nupela eplikesen ol bai mekim long kot, bai nem bilong wanpela man tasol i stap long makim ol planti handet lain long Manus egensim Stet bilong PNG.

Em i tok dispela bai karamapim kompensen long wanem, kot i tok pinis kalabus bilong ol long Manus i brukim lo, na ol i mas salim ol i go long Australia o go long narapela kantri.

## Ol taitwara i hamaim yet PNG Morobe provins

**Caroline Tiriman i raitim**

OL bikpela ren i wok long kamapim yet planti hevi long Morobe we ol graun bruk na ol taitwara i bagarapim pinis moa long 40 haus long Salamaua distrik.

Ol ripot i kam long Lae i tok, ol graun bruk i bin bagarapim tu wanpela skul na kamapim hevi long ol sumatin i bin wokim test long dispela wik.

Ol i tok moa long 5-pela pipel i dai pinis long ol dispela taitwara i bin stat samting olsem tupela wik i go pinis.

Nau Gavana bilong Mo-

robe provins long givim sampela helpim i go long ol pipel i kisim taim long ol dispela taitwara.

Salamaua distrik i wanpela ples long provins we i save pulim planti turis, long wanem, em i gat wanpela bikpela konsevesen eria na tu, planti pait i bin kamap long hap long Wol Woa 2.

Charles Kekeng, NBC Televisan ripota long Lae husat i bin go long Salamau long dispel wik i tokim Redio Australia olsem, ren i wok long go het yet long Salamau na ol narapela ples long provins.

## Turkey i pasim 15 nius ogenaisesen

GAVMAN bilong Turkey i tok orait long tupela moa imejensi lo we i pasim 25 media ogenaisesen. Wanpela bilong ol em nius megesin bilong ol meri. Gavman i mekim olsem bikos em i tok ol dispela nius ogenaisesen i wok wantaim ol ‘teroris ogenaisesen.’

Gavman i rausim tu moa long 10,000 pablik sevan em i tok i save wok wantaim Fethullah Gulen husat i stap nau long Amerika. Gavman bilong Turkey i bin sutim tok long Gulen long taim sampela lain soldia i traime long tekova long gavman long 15 Julai.

Imejensi lo 675 i givim oda long pasim 10-pela niuspepa, tupela nius ejensi na tripela megasin. Dispela i mekim namba bilong ol nius ogenaisesen gavman i bin pasim i surik i go antap long 160. Planti bilong ol dispela nius ogenaisesen gavman i bin pasim long Sarere i gat hetkwata bilong ol i sap long saut is we moa Kurdish pipel i stap. “Ol polis i kam long 4 klok



Wanpela wokman bilong pro-Kurdish DIHA nius ejensi long opis bilong em long Istanbul long 30 Oktoba.

moning na pasim opis,” Beatrice Canozar, wanpela nius ripota bilong Jinha, nius ejensi em ol meri tasol i wok long en, i tok.

“Mipela i no kisim wanpela kot oda. I no gat gutpela as bilong dispela. No gat wanpela tok save i kam long gavman.”

Gavman i bin kalabusim Canozar long Desemba long taim em i wok long ripot long wanpela protes i

kamap long Diyarbakir bikos ol polis i tok em ‘i luk olsem em i amamas.’

Em i tok, “ Bai mipela i painim rot long tok save long ol pablik. Bai mipela i ripot yet. Ol i no inap pasim maus bilong mipela.”

Ol human raits grup i mekim strongpela toktok egensim dispela pasin bilong gavman bilong Turkey.

Wanpela independen grup, P24 i tok gavman i ares-

tim 99 nius ripota bihain long ol trabel i bin kamap long Julai. Dispela bikpela namba i mekim Turkey i kamap namba wan kantri long wol long kalabusim ol nius ripota.

Planti ol nius ripota i no gat wok nau na gavman i rausim tok orait pas bilong ol ripota. Ol i stopim paspot bilong sampela ripota tu na dispela i stopim ol long raun i go long ol arapela kantri.

Gavman i rausim tu moa long 2,000 tisa long ol yunivesiti aninit long dispela imejensi lo, planti bilong ol i memba bilong yunion bilong ol tisa ol i kolim Egitim-Sen.

Gavman i bin kamapim stet ov imejensi long mun Julai na nau ol i skruim i go long tripela mun moa.

Aninit long lo, Presiden Recep Tayyip Erdogan na AKP kabinet i ken abrusim palamen na rausim ol rait na fridom bilong ol pipel.

Gavman i arestim pinis 37,000 pipel na moa long 100,000 ol pablik sevan.

## Ol loya bilong PNG na Australia wokim nupela eplikesen long makim ol Manus refuji

**Sam Seke i raitim**

OL ligel tim we i makim ol asailam sika na refuji long Manus Ailan i tok pinis bai ol i kamapim nupela eplikesen long Suprim Kot bilong PNG long ol i makim ol long kot.

Dispela i bihainim Suprim Kot disisen long dispela wik we i lukim wanpela jas i bin wanbel wantaim loya Ben Lomai long tim blong en, na tupela jas i egensim eplikesen bilong ol.

Mista Lomai i tok tupela jas i rausim dispela eplikesen long teknikel sait long husat i ken makim ol refuji na asailam sika long Manus.

Em i tok tim bilong em i

wanbel pinis nau long bai ol i putim nem bilong moa long 800 lain long ol imigresen senta bilong Australia long Manus long ol i sainim nem bilong ol.

Mista Lomai i tok ol wok ol i mekim bai stap insait long ruling bilong Suprim Kot long Epril long keis bilong Belden Namah.

Em i tok dispela i karamapim tu tingting bilong ol long salim ol dispela lain long Manus i go long Australia o go long narapela kantri - na kompensesen bilong ol long wanem ol i kalabusim ol nating long Manus egensim lo bilong PNG olsem kot i bin tok.

Harim TOK PISIN long Radio Australia  
**101.9FM**  
 Port Moresby

**Tok Pisin Service**  
 6am - 7am 6080; 7240(KHZ)  
 7pm - 9pm 5995; 6020; 9710; 1280(KHZ)



# APEC miting bai opim dua bilong kirapim moa bisnis



Praim Minista Peter O'Neill.

**PRAIM Minista Peter O'Neill i tok PNG i opim dua long mekim bisnis taim gavman i apim han long holim bikpela bung bilong ol lida bilong APEC long 2018.**

Taim Oposisen Lida Don Polye i les long PNG i holim dispela bikpela bung, Praim Minista O'Neill i tok APEC miting em i wanpela sans long opim PNG long long foren investa na bisnis manmeri long kam insait na invest.

Em i tok moa long 7, 000 CEO na bos manmeri bilong sampela bikpela kampani i operet insait long 21 memba ikonomi bilong APEC ba gat sans long kam lukluk raun long PNG long 2018.

Mista O'Neill i tok dispela bai maketim kantri long wol olsem PNG em i wanpela gutpela ples bilong inves na mekim bisnis.

"Sans bilong promotim

kantri bilong yumi olsem wanpela gutpela ples bilong mekim bisnis em i nau long taim bilong holim dipslea APEC bung," Mista O'Neill i tok.

Em i tok moa long 50 pesen bilong tred na invesmen long wol i save kamap insait long APEC memba ikonomi na PNG bai kisim plant gutpela samting long dispela bung.

Mista O'Neill i autim dispela toktok long grivens dibeit taim long Palamen long las wik Fraide.

Long wankain taim, Oposisen lida Don Polye i bin toktok strong long gavman i mas stopim dispela plen bilong holim APEC bung.

Mista Polye i tok gavman i gat bikpela dinau na mani mak bilong holim dispela APEC bung bai go antap stret, moa long K120 milien we Praim Minista O'Neill na Spots na APEC Minista, Justin Tkatchenko, i tok long en.

"Mani mak bilong holim dispela bung bai abrusim K120 milien. Gavman i no gat mani long ranim kantri, na mipela i les long gavman i kisim moa dinau mani gen," Mista Polye i tok.

Tasol Praim Minista O'Neill i tok Gavman i gat mani. Em i tok Mista Polye i no ken giamanim kantri na manmeri.

"Sapos gavman i no gat



Oposisen Lida Don Polye.

mani, ol pablik sevan bai no inap wok na bai no inap kisim potnait mani. Ol bai pasim skul na haus sik," Mista O'Neill i tok.

Em i tok gavman i redi pinis long holim dispela

bung long 2018 na arapela ol poroman kantri bilong PNG i redi long helpim PNG.

Em i tok PNG i redi long holim dispela bung na Mista Polye i no ken giamanim pipel.

## Hela gavman laik mekim bisnis



Gavana bilong Hela, Francis Potape.

PROVINSAL Gavman bilong Hela i kirap no gut olsem bisnis em i wanpela namba wan samting long kirapim provins na ol i laik mekim bisnis.

Long las wik Fonde, Hela Provinsal Eksekutiv Kaunsil (PEC) i wanbel long kamapim wanpela nupela kampani bilong provinsal gavman.

Gavana bilong Hela Provins, Francis Potape, i tok ol i laik rejistaim wanpela nupela kampani long mekim bisnis, givim sans long manmeri i ken wok na kirapim provins wantaim dispela nupela kampani.

Mista Potape i tok nem bilong dispela kampani bai kamap Hela Investment Corporation Limited (HIC).

HIC bai kamap olsem bisnis han bilong Hela Provinsal Gavman na bai helpim provinsal gavman long mekim bisnis, kisim mani na developim provins.

Mista Potape i autim dispela toktok long las wik Fonde bihain ol memba bilong Hela Provinsal Eksekutiv Kaunsil i bin holim wanpela bung long Tari.

Mista Potape i tok gavana bilong Hela Provins bai kamap siaman bilong dispela kampani.

Em i tok bod memba bilong dispela kampani bai tupela LLG Presiden bilong tripela open ilektoret long Hela, wan-

pela mausman bilong sios na narapela bilong ol meri.

"Dispela kampani inap long kamap longpela taim yet. Taim Hela i kisim provins bilong em yet, em inap long gat dispela nupela kampani bilong provins," Mista Potape i tok.

Mista Potape i tok dispela kampani bilong provinsal gavman bai holim olgeta ekwiti bilong provinsal gavman long PNG LNG Projek na arapela o invesmen bilong provinsal gavman long oil, ges, eneji na mineral sekta. "Ol save man tasol bai ranim dispela kampani. Mipela bai no inap pilai politiks insait long operesen bilong dispela kampani," em i tok.

Wantok Niuspepa i bin sekim kampani rejistri bilong Invesmen Promosen Atoriti (IPA) na i painimaut olsem nem bilong dispela kampani, Hela Investment Corporation Limited, i stap pinis.

Kampani namba bilong Hela Investment Corporation Ltd em 1-74340. Dairekta na papa bilong dispela kampani em wanpela man tasol, na nem bilong em i Eddie Alembo, na em yet i seaholda bilong dispela kampani.

Em i rejistaim dispela kampani long 18 Jun 2010, 6-pela yia i go pinis.

## Trukai stat long planim rais long PNG

TRUKAI Industries Limited, kampani bilong mekim namba wan Trukai Rais bilong ol PNG manmeri, i gat bikpela plen long kirapim egrikalsa long dispela kantri.

Sif Eksekutiv Opisa (CEO) bilong Trukai Industries, Greg Worthington-Eyre, i tok ol i wok long traim long planim rais long Oro, Wes Nu Briten, Sentral na Morobe provins.

"Long Morobe Provins, mipela i gat 7 hekta graun, mipela i planim rais long dispela 7 hekta fil," em i tok.

Em i tok Trukai Industries i bin sainim wanpela agrimen wantaim Morobe Provinsal Gavman, na Chingwam Rice Cooperative long planim rais long dispela 7 hekta graun.

Sais bilong dispela 7 hekta em i olsem 7-pela ragbi fil.



Wanpela masin ol i kolim rais havesta i pikim rais long Chingwam long Makham Veli, Morobe Provins.

Trukai i planim rais long Ragiampum ples, na dispela bai kamapim moa long 30

tan bilong rais long sevim ol helpim ol asples manmeri PNG manmeri. long Vanapa long Gabadi Long Sentral Provins, ol i long planim rais.

## Namba bilong maining laisens long PNG go antap - MRA

James G. Kila i raitim

**NAMBA bilong ol ektiv maining laisens long PNG i bin go antap namel long mun Janueri na Ogas 2016.**

Mineral Risoses Atoriti (MRA) i tokaut long dispela insait long ripot bilong en long Maining na Petroleum Riviu volium 4 we i kamaut i no long taim i go pinis.

Ripot i soim olsem namel long mun Janueri na Ogas 2016, namba bilong ol ektiv maining laisens i bin surik long 125 mak i go 134, dispela em seven pesen go antap.

Dispela i soim gutpela sain long maining sekta long kantri. Moa long en tu ol kampani i stretim gen ol lain bilong ol tu i go antap long 54 mak i go antap long 68 mak.

MRA ripot i tokaut olsem namba bilong ol ektiv maining laisens i go antap i soim olsem maining sekta bai gat gutpela wokabout bilong en

ol yia bihain.

MRA i givim gutpela ripot tu olsem spesel maining lis (SML) long PNG i soim gutpela sain bihain long rejistresin bilong Frieda Riva long Wes Sepik na Wafigolpu SML long Morobe provins.

Ripot i tokaut tu olsem dispela ol gutpela rekot nau i kamaut em bikos long wanpela kampani Nautilus, husat i tokaut long 50 ofso ekploresen laisens bilong en long solwara insait long yia 2014 i kam olsem.

MRA i tokaut long ripot tu olsem namba bilong ol maining eksploresen o wok bilong painim ol nupela mineral long graun insait long PNG i go daun tru. Dispela em bikos long hevi bilong mani long wol we i lukim ol eksploresen kampani i stopim wok bilong ol. Mani long sait long maining eksploresin i pundaun long K595.7 milien

long 2013 i go daun long mak olsem K350 milien bihain long tripela yia.

Ripot bilong MRA long riviu i soim tu olsem Highlands Pacific Limited (HP) i bai wok bung wantaim Anglo Ameriken, wanpela maining

kampani bilong Amerika long wanpela join vensa agrimen long developmen bilong Star Maunten kopa/gol projek long Westen provins. Dispela eria i stap klostu long bikpela Ok Tedi projek long Star Maunten.



Bikpela hai presa esid litsing plent bilong Ramu Nickel Projek long Basamuk Rifaineri long Madang.

# Wano em bikpela pes long salim pinat long Basamuk

James G. Kila i raitim

LAS wik, Wantok Niuspepa i bin raun long Basamuk 'marmar' maket na lukim wanpela liklik boi i amamas long sindaun wantaim mama bilong em na salim pinat long maket.

Dispela liklik boi em bilong ples Dugur na em wantaim mama bilong em i bin go salim pinat ol groim arere long bikpela riva ol kolim Yaganon.

Long Fonde, Wano wantaim mama bilong em i lusim ples na wokabaut i go salim pinat long moning tru, na long samting olsem 10-kilok bilum pinat ol i karim i go i pinis. Neks de long Fraide, Wano i bihainim gen mama bilong em i go long maket na Wantok Niuspepa i lukim em na stori wantaim em.

Mama bilong Wano i tok Wano i gat 4-pela krismas na em wanpela strongpela pikinini husat i save amamas long bihainim mama bilong em i go long gaden long planim pinat na bihain long tupela o tripela mun taim pinat i redi long salim long maket.

Wano wantaim mama bilong em na planti ol lokal fama long Basamuk i amamas olsem ol wokman bilong Ramu NiCo Menesmen (MCC) i save baim ol gaden kaikai bilong ol na ol save kisim liklik mani long baim ol samting long sapotim ol yet.

Prais bilong pinat em daunbilong tru long rurel Basamuk rot sait maket long Raikos distrik, Madang provins.

Wanpela bikpela hip o grup pinat em 10 toea tasol.



Wanpela kastoma go baim pinat long Wano wantaim mama bilong em. Foto: James G. Kila

Planti ol nupela lain husat i go namba wan taim long Basamuk na raun long dispela liklik maket arere long Basamuk taun save guria na mangal stret long pinat bilong Basamuk.

Planti ol Mosbi lain i save tok dispela 10-toea grup pinat long Mosbi bai K1 stret. Long Madang taun maket em bai 50 toea.

Ol i tok olsem pastaim tru taim i no gat Basamuk Rifaineri, ol pipel i save painim hat tru. Planti ol pipel no save go long taun na planti ol bisnis wok no save kamap na planti pipel i no wok.

Nau taim Ramu NiCo i kirapim rifaineri bilong en long Basamuk, ol mama long ples

nau i gat gutpela sans stret long salim ol gaden kaikai, kumu na prut long ol liklik maket na kisim mani bilong helpim sindaun bilong ol.

Mama bilong Wano i tok ol i save amamas long salim pinat long marmar maket bikos ol Saina wokman na tu ol PNG i save baim long ol.

Liklik mani em i kisim long maket em i save go baim ol stua kaikai na tu, sampela em save baim ol samting Wano i laikim long stua.

Em i amamas olsem dispela kain maket i stap na em lukim pes bilong mani long rurel komyuniti bilong em long Dugur.

## NSO Nesanel Statistisen em i trupela man

Frieda Sila Kana i raitim

NESENEL Statistisen, Roko Koloma em i trupela man husat i kirapim wanpela ogenaisesen we i klostu long dai olgeta. Dispela em i strongpela toktok we Ekting Deputi Nesanel Stetistisen, Henao Karil bin mekim long stretim sampela paul toktok i bin kamap long wanpela niuspepa long las wik Fonde.

Toktok i bin kamap long 'yutok' seksen bilong niuspepa we i tok olsem Nesanel Stetistiks opis i bin bagarapim bikpela mani bilong wok tasol i no gat gutpela stetistiks i kamap. Olsem na Deputi Nesanel Stetistisen wantaim ol narapela senia opisa i bin singautim ol nius ripota long las wik Fraide na tokaut olsem Mista Roko Koloma em i trupela man.

"Aninit long Mista Koloma, mipela i lukim bikpela senis i kamap long NSO. Planti opisa we i bin stat wok planti yia i go

pinis na i no save kisim wanpela insevis nau i go long ol skul na ol i kisim promosen.

"Nem bilong NSO nau i stap long ol rijonal grup na long wol bikos long gutpela wok na nem bilong dispela man," Mista Kari i tok.

Ol narapela opisa husat i bin kamap na givim tok sapot na tok amamas bilong ol long bos bilong ole m, pastaim Deputi Nesanel Stetistisen, Denis Gonniso, Ekting Divisen het blong ikonik stetistik Tony Waisa, Populesen na Sosel Stetistik Divisen het, Misis Hajily Kele na Koporet Sevis Divisen Het, Vele Veavu.

Mista Kari wantaim ol opisa bilong NSO i singaut long ol lain husat i mekim toktok long niuspepa na long sosel midia long kamaut na dibeit wantaim ol long ol toktok bilong mani bilong wok, na ol i no ken hait na toktok.

Nesanel Stetistiks Opis (NSO)

nau i gat wanpela Sampel o piksa Demograpik helt sevei (DHS) i wok long kamap long Nesanel Distrik, Sentral Provins na sampela narapela provins we ol i bin makim long mekim. Dispela sevei em bilong painim aut helt stori bilong ol meri, man na ol pikinini insait long wan wan haus long hap we ol i makim pinis.

Mista Koloma i bin tok olsem, long kain kantri olsem Papua Niugini, em i kostim bikpela mani tru long wokim stret ol bikpela sevei olsem na ol i save wokim tasol ol sampel sevei we ol bai makim sampela namba tasol bilong ol pipel, samting na ples long kisim ripot we bai givim save long ol lain i save wokim polisi na long katim ol mani bilong gavman long mekim wok.

Dispela sevei, Demograpik Helt Sevei i bin stat long mun Oktoba na bai pinis long Desember dispela yia.




## INVESTMENT TOKTOK wantaim DR. STEPHEN NASH

Long dispela taim bilong ikonik long wetim baset we bai kamap long Novemba 1 2016, long palamen, wantaim sameri bilong dispela presa we i stap long dispela taim.

### Ikonik taim

Long dispela taim bilong ikonik ol dispela samting i stap ples klia:

- Long 31 Julai 2016, Dipatmen bilong Treseri i putim aut Mid-Yia Ikonik na Fiskal Autluk (MYEFO), we lukluk bilong GDP em ol i Katim i go daun, ol i lukim olsem inflesen i go antap, na ol reveniu o mani i kam insait, em ol i lukim olsem bai i go daun. Olsem mipela i bin toktok pinis long narapela taim, kamap bilong ol reveniu i bin senis bikpela tru, olsem insait long tupela yia tu, we ol reveniu o mani i kamap long ol samting bilong salim na long ol sevis, i bin go bikpela liklik,
- long Yunaitet Stets (US), bon maket i bin wok long go bikpela wantaim tingting bilong putim sampela kontrol long ol mani polisi long sampela taim, tasol moa long en bihain long sama holidie sisen, na long wankain taim em i klia long mani maket nau olsem piksa i soim long daunbilong,



- mani na bon maket i save kamapim samting pastaim long ol i kamap, na dispela em wanem samting ol i wok long mekim long dispela taim; trupela tok em olsem ol i wok long stat pinis long mekim mani polisi bilong US i go tait. Strongim mani polisi liklik tasol bai i no inap long kamapim bikpela hevi long US maket, tasol, tasol em i no bin olsem long las yia, taim ol maket i bin wari long taim mani polisi i bin tait, na tu long stat bilong dispela yia, taim ol ikwiti maket i pundaun go daun olgeta bikos long tingting bilong mekim mani polisi i go moa tait,
- Ol maket long Yurop i stap wari yet long diflesen o mani mak i pundaun, na taim Yunaitet Kingdom (UK) i lusim Yuropien Yunien (EU), em bai givim tingting long ol narapela kantri long wokim wankain pasin tu, na ol narapela kantri bai taim long mekim strong bilong mani bilong ol tu i go daun, na em bai kamapim moa eksport na mekim ikonik i gro wantaim ol eksport. WTaim UK i wok long mekim ol dispela samting, ol narapela Yuropien kantri i wok long lukluk long ol na aigris, na em bai ol i aigris olsem na aigris bilong ol bai kamapim moa kantri long tingting long lusim EU. Wanpela samting we inap long kirapim tingting bilong ol em long nupela konstitusesenel referendum long Itali. Sapos kamap bilong referendum i sakim tok bilong gavman, em bai wanpela bilong ol EU memba wantaim planti hevi bai go insait long bikpela hevi bilong politik. Itali em i no nupela long hevi bilong politik na ol paul tingting, ol kain hevi i no gutpela long EU long kain taim we em i wok long bungim strongpela taim, na
- gro bilong esia em i olsem sab-tren, tasol em i stap long mak antap tru winim ol narapela global rijon.

### Mani bilong mekim wok

PNG i gat ol taim bilong ol dinau bilong longpela taim bai kamap long taim bilong ol long pinis, olsem na taim bilong ol dinau long pinis em i no nupela long gavman, o long mani i go long Stet. Tasol, wanem salens long dispela yia em i mak bilong bungim olgeta tripela samting olsem:

- Novemba 2016
- Januari 2017, na
- Februari 2017.

Olgeta mani dinau we bai kisim taim bilong ol long pinis i stap long mak bilong PGK 1 bilien, na ol dispela taim bilong dinau i pinis bai mekim hat tru olsem Treseri i bin tokaut long MYEFO, olsem i gat moa salens. Moa long dispela, baset bilong USD 1 bilien mani, olsem ol i bin tokaut i no longtaim i go pinis, i no kamap ples klia yet. . Kain hatpela taim olsem bai inap long mekim gavman long kamap wantaim sampela nupela kain wei bilong kamapim moa mani long kam insait, olsem ol kain wei we i save stap wankain, na inap long em bai go wantaim ol tankis antap long ol samting bilong salim na ol sevis ol i givim.

### Pasim toktok

Olsem yumim lukim long antap, nau em i hatpela taim bilong ikonik, olsem taim US i lukluk moa long strongim ol polisi bilong mani bihain long longpela taim, na olgeta narapela hap bilong wol ikonik i wok long surik i go long sait, long wei bilong ikonik gro gut. US ikwiti maket i no olsem last aim we Fed i stat long strongim ol wei bilong yusim mani, na ol narapela samting moa wantaim US ikwiti maket yet i stapim Fed long stopim ol strongpela lo long pasim mani, long stat bilong dispela yia. Wankain tasol olsem ol taid na taim i no save wet long wanpela man, ol bai i no inap wet long wanpela maket long ol bai stat long mekim ol strongpela lo bilong bosim ol mani.

Bai yumi tok gen olsem, yumi lukluk i go het long ikonik em i no luk gut tumas, na PNG em i wok long pilim pinis pundaun bilong ikonik long daunbilong bilong global gro, na salens bilong ol mani long kam insait, we kantri i wok long bungim, em i piksa olsem ol dispela senis long wol i wok long kamapim. Tasol sapos ol lukluk bilong samting i olsem wanem samting yumi toktok long antap, em bai luk olsem ol samting bai go bagarap moa insait long sotpela taim tasol.

Antap long olgeta dispela bikpela wari, ol wan wan liklik salens, olsem yumi lukim long antap, i mekim lukluk bilong PNG i no gutpela tumas. Long kain taim olsem, sapos i no gat gutpela samting i kamap long ol invesmen em bai hat moa, na dispela samting i mas stap long tingting bilong yumi, taim yumi lukluk long ol mani we bai kamap long ol supauesen long dispela kalenda yia. .



Long kamap Nambawan pren bilong yu na famili; halivim, strongim na lukautim moni gaden bilong yu nau na bihain.

**BIGGER, BETTER, SAFER,  
STRONGER AND STILL NUMBER 1**

# Nu Silan i daunim Ingran



Jordan Rapana bilong ol Nu Silan i bin skoim namba wan traim bilong ol long namba wan hap bilong resis.

## NU Silan i daunim ol asples tim, Ingran, wantaim wangepela poin, 17-16, long Foa Nesens resis.

Johnson, husat i winim 'men ov da mets', i skoim las trai long daunim ol Ingran long 2013 Wol Kap semi fainal, i kisim fil go na i mekim ol Kiwi long win taim 14 minit i stap yet long bungim pinis bilong resis.

Gareth Widdop bilong ol Ingran i kikim tupela penelti kik i go insait na i pretim ol Kiwi insait long 20 minit.

Tasol, ol Nu Silan i strongim ol yet na Jordan Rapana i putim namba wan trai na Jordan Kahu i bin kikim kon-

vesen i go insait na ol Kiwi i stap pas, 6-4, i go inap long taim bilong malolo.

Ol Kiwi i bin skruim wankain poin bihain long malolo taim Johnson i stilim bal na putim trai we Widdop i salim bal i go long poro pilaia bilong em. Kahu i kikim konvesen i go insait na ol i stap pas wantaim 8-pela poin long dispela taim.

Bihain, ol Ingran tu i kisim strong long asples bilong ol na i pilai strong we ol i bin skruim skoa bilong ol insait long namba tu hap bilong resis.

Ol i bin stap 16-16 klostu long pinis bilong resis taim, tasol Johnson i laik soim kala

bilong em na putim wangepela fil gol long taim 14 minit i stap yet na ol Kiwin i win.

Kosa bilong Nu Silan, Jesse Bromwich, i tok bipo long resis i stat olsem, ol i bihainim raun robin fomet we resis i kamap long Sarere em i wankain olsem semi fainal.

Ingran bai pilai egensim ol Skotland long dispela wik Sarere na ol bai pilai egensim ol Kangaroo long Novemba 13

Kosa bilong ol Ingran, Wayne Bennett, i tok olsem ol Ingran i mas skul gut long win bihain long ol i lus, 17-16, egensim ol Nu Silan long taim ol i opim Foa Nesens resis.

# Chelsea i daunim Southampton

CHELSEA i go antap long namba foa ples long lata bilong Premia Lig soka resis bihain long ol i bin daunim ol Southampton.

Ol Blu i stap pas taim Eden

Hazard i kikim bal i go insait namel long lek bilong golkipa, Fraser Forster.

Southampton i bin gat planti sans, tasol ol i painim hat long karim bal i go in-

sait long banis bilong ol Chelsea.

Dispela win em i namba foa taim bilong ol Chelsea long win long dispela lig resis.



Kepten bilong ol Chelsea, Diego Costa, i putim wangepela gol egensim ol Southampton em i namba 19 gol bilong em inap long 11 Premia Lig gem.

# Almandin i winim Melbourne Kap

DISPELA 2016 Melbourne Kap resis em i namba wan taim bilong Almandin long winim taitel.

Wina i pinis pas long Heartbreak City, husat i kamap klostu long Almandin na Hartnell i kamap namba tri ples long resis.

Kauboi husat i stap antap long Almandin em Kerrin McEvoy na Robert Hickmott i save

trenim em.

Dispela em i namba faiv taim bilong papa bilong Almandin, Lloyd Williams, long winim ol bikpela resis.

Almandin i bin go pas long Heartbreak City, Hartnell, Qewy, Who Shot Thebarman, Almoonuith, Beautiful Romance, Exospheric, Petathalon na Big Orange.

# Australia i daunim ol Skotland

FOA Nesens resis bilong Skotland i kam stop taim ol Australia i daunim ol, 54-12, wantaim 10-pela trai.

Ol pilaia bilong Australia husat i bin putim trai em, Ferguson i putim wangepela trai, Cronk i putim tupela trai, Mansour i putim tupela trai, Dugan i bin putim wangepela trai, Frizell i putim wangepela trai, Morgan i putim

wangepela trai na Trabojecvic i putim wangepela trai. Maloney i bin putim 7-pela konvesen kik i go insait long ol 10-pela trai.

Na long sait bilong ol Skotland em Brierley na Kavanagh i bin putim wan wan trai na Brough i kikim tupela konvesen i go insait.

Long ol resis bai kamap long dispela wiken em ol

Skotland bai salensim ol Ingran long namba wan taim bilong ol we resis bai kamap long Sarere, Novemba 5. Ol Nu Silan bai salensim ol Australia.

Long Fraide, 11 Novemba, 2016, Nu Silan bai salensim Skotland na Ingran bai salensim Australia long Sande, 13 Novemba, 2016, long wik bihain.



Cooper Cronk bilong Australia i ran i go long putim namba tu trai bilong em long namba wan hap bilong resis.

# Ryles i kosa bilong autum Tes resis

INGLAN i makim Melbourne Storm ragbi lig kosa, Jayson Ryles, olsem kosa bilong ol long autum Tes resis.

Ryles i wok wantaim difens bilong Ingran insait long tupela wik bipo long resis egensim Saut Afrika long Twickenham bai kamap long Novemba 12.

"Melbourne Storm i bin pilai gut long ol gren fainal resis bilong NRL na mipela i laikim Ryles long strongim ol pilaia bilong mi

long sait bilong strongim banis bilong ol," Het kosa bilong Ingran, Eddie Jones i tok.

Skwat bilong Ingran i stap long trening hap long Portugal we Ryles i helpim difens kosa, Paul Gustard, insait long tupela wik.

"Gustard i mekim bikpela wok long bungim difens bilong mipela na dispela em sans bilong ol kosa na pilaia i lainim ol skul toktok gut. Banis em i namba wan samting long gem bilong mipela," Jones i tok.



Jason Ryles i sanap long han kais i bin pilai 15 Tes resis pinis bilong Australia lagbi lig sait.



Almandin i kamap namba wan long Melbourne Kap resis we Kerrin McEvoy i sindaun antap long em.



# Kostal Paiplain Wimen mekim histori na karim fleg bilong Ramu NiCo Projek

**OL MAMA long Kostal Paiplain Wimen grup i mekim histori stret na nau karim nem bilong Ramu NiCo Projek long sait long gutpela menesmen na gutpela stori long ai bilong Mineral Risoses Atoriti (MRA).**

Long las wik Fraide, MRA i luksave long Kostal Paiplain Wimens Grup na givim ol luksave pepa o setifiket em menesing dairekta bilong MRA, Philip Samar i sainim. Setifiket ya i givim tok amamas na gutpela luksave long hatwok ol dispela mama grup i mekim we i lukim PMV transpot projek MRA i givim i ran gut stret na lukim gutpela win-moni.

MRA Menesa bilong Sasteinability Plenning Developmen Kodinesin Divisen, Stella Brere i bin amamas long givim setifiket i go long siameri bilong Kostal Paiplain Wimen Grup, Miriam David long liklik seremoni we i kamap long Operesen Bes bilong Ramu NiCo long Madang. Mis Brere i bin go wantaim Pentika Mambu husat em Jenda Kodineta bilong MRA.

Mis Brere i tokim ol mama grup bilong Kostal Paiplain olsem long makim maus bilong MRA na menesing dairekta, Philip Samar, MRA i amamas long lukim olsem ol mama grup bilong Kostal Paiplain Wimens grup i lukautim gut dispela projek ol i kisim aninit long Wimen in Maining (WIM) Smol Grent Skim.

Mis Brere i tok dispela luksave pepa ol i kisim i soim tu olsem dispela WIM projek taim em 18 em pinis. Dispela i soim tu olsem MRA bai no inap moa sekim ol mama long wok ol i wokim. Wok nau i stap long han bilong ol mama grup yet long menesim na mekim projek i ron gut na karim gutpela kaikai long sevim ol meri insait long projek eria. Em i min tu olsem dispela projek em ol mama i bosim na bai ronim ol yet.

Long 2014 Ramu Projek i bin kisim foapela projek aninit long WIM. Ol mama grup long Kurumbukari i kisim wanpela PMV trak, ol mama long Inlen Paiplain tu wankain, na ol meri grup long Basamuk i bin kisim wanpela pigeri projek. Tasol ol dispela projek i no ran orait tumas bikos no gat gutpela menesmen na ol meri long hap i no wok-bung na planti laik kamap papa bilong projek

na nogat gutpela menesmen i stap.

Ms Brere i tokaut olsem dispela WIM projek we ol Kostal Paiplain Wimen grup i kisim em gutpela projek we i karim kaikai, na dispela projek i ken soim gutpela piksa long ol arapela mama grup insait long projek eria na tu long Madang provins.

“Dispela projek bai givim tingting o aidia long ol meri long kisim eksperiens na tu developim skil bilong ol long ranim projek,” Mis Brere i tok.

Em i kisim liklik salens long ol merit u long ol mas givim ripot long wanem wok ol i wokim na ol arapela memba i ken amamas. Ol mama tu i mas soim pes long ol bikpela miting long givim stori bilong projek bilong ol.

Ramu NiCo Komyuniti Afes jenda opisa, Agatha Yombai, i givim bikpela tok amamas na tenkyu long ol mama long Kostal Paiplain Wimens grup long gutpela wok ol i mekim long karim dispela WIM smol grent skim projek i go het.

Yombai i tok olsem ol mama grup bilong Kostal Paiplain nau i karim pleg blong Ramu NiCo Projek bikos projek bilong ol i karim gutpela kaikai.

MRA Kodineta bilong Ramu Nikel Projek, Carter Oiee, husat i bin stap long dispela taim tu i givim bikpela tok amamas bilong em long ol mama bilong Kostal Paiplain Wimen grup long kisim setifiket na gutpela luksave i kam long MRA.

Mista Oiee i tok amamas long ol eksekutiv bilong Kostal Paiplain Wimens grup na i tok olsem bikpela salens em olsem taim wanem lain i givim liklik samting long yupela, ol save putim ai long yu long wanem samting yu mekim, na bai yu pundaun o dai o no gat. Tasol yupela ol meri long Kostal Paiplain i soim stret olsem yupela i gat gutpela tingting long wok-bung na sanap strong wantaim na kamapim gutpela wok tru.

Mista Oiee i tokaut olsem dispela transpot projek bilong ol mama long Kostal Paiplain em gutpela stori na naispela piksa long soim ol arapela insait long Ramu Projek.

Em i tokaut olsem dispela transpot projek bilong ol mama em ating wanpela projek tasol we i karim gutpela kaikai moa long ol arapela projek na em winim tu ol projek ol man i kamapim.



MRA Menesa bilong Sasteinability Plenning Developmen Kodinesin Divisen, Stella Brere i givim setifiket long siameri bilong Kostal Paiplain wimens grup, Miriam David.

Ol eksekutiv bilong Kostal Paiplain wimens grup soim luksave setifiket MRA i givim ol.



PMV transpot projek bilong ol Kostal Paiplain meri ran gut.



Moto bot bilong ol Kostal Paiplain mama ran gut.



135 KM Slurry Pipeline



BSK Refinery

# Ireland na Wales i kwalifai long RLWC2017



Ol Wales i amamas long ol i bin win long Yuropien Kwalifaing na nau ol i redi long Ragbi Lig Wol Kap 2017 resis bilong ol man bai kamap long yia i kam.

**IRELAND** na Wales bai resis long Ragbi Lig Wol Kap 2017 (RLWC2017) bihain long tupela kantri wantaim i topim long wan wan Ragbi Lig Yuropien Federesen (RLEF) kwalifaing grup bilong ol.

Wales i wina bilong RLEF kwalifaing grup A, ol bai kisim ples long Yuropien Kwalifaing 1 na go insait long Pul C bilong RLWC2017 tonamen dro na Ireland bai kisim ples long Yuropien Kwalifaing 2 olsem wina bilong grup B.

CEO bilong RLWC2017, Andrew Hill, i welkamim tupela tim long skruim namba i go antap long 13 we Australia na Nu Silan bai lukautim resis na tripela pul resis bai kamap long Papua Niugini long Oktoba 27 i go inap long Desemba 2 bilong yia i kam. "Mi laik tok tenkyu long Ireland na Wales long kwalifai long Ragbi Lig Wol Kap resis bai kamap long yia i kam.

"Wantaim bikpela namba bilong ol man long narapela kantri i stap long komyuniti long Australia, yumi save olsem dispela tupela tim bai kisim strongpela sapot na win long ai bilong ol nupela manmeri long

resis taim bilong tupela.

"Wantaim liklik long 12-pela mun i stap yet bilong tonamen bai stat long Fraide, 27 Oktoba, 2017, mipela i lukluk long strongim 14 na fainal tim bihain long fainal kwalifaing resis name long Itali na Rasia bai kamap long tumora Fraide, Novemba 4.

"Ogenaising Komiti i redi long welkamim olgeta kantri husat i resis na win long Yuropien Kwalifaing sempionsip, na ol sapota bilong ol long bikpela Ragbi Lig Wol Kap resis," Hill i tok.

Dispela 2017 tonamen em i namba wan taim bilong ol Wales Dragon long resis long Ragbi Lig Wol Kap we ol bai pilai long Sauten Hemispia inap long 1975 na namba foa taim bilong ol Irish Wolfhounds.

Ol tim we Wales bai salensim long ol pul resis bilong RLWC2017 em Papua Niugini bai kamap long Pot Mosbi long 28 Oktoba, 2017. Ol bai salensim Fiji long Townsville stedium long 5 Novemba, 2017 na ol Ireland long Perth Rectangular Stedium long 12 Novemba, 2017.

Namba wan tim we ol Ireland

bai salensim long pul resis bilong RLWC2017 em i grup 3 wina bilong Yuropien Kwalifaing sempionsip na resis bai kamap long Barlow Park long 29 Oktoba, 2017. Ol bai salensim Papua Niugini long 5 Novemba, 2017.

Namba 14 na fainal hap bilong RLWC2017 resis bilong ol man em wina bilong Itali na Rasia bai kisim. Tupela bai resis long RLEF Yuropien Kwalifaing fainal long tumora long Leigh, Ingran, long kisim namba 14 ples bilong RLWC2017 resis.

Wina bilong dispela fainal bai kamap Yuropien Kwalifaing tim namba tri long Pul D bilong RLWC2017 dro.

Wina bilong Itali na Rasia long Yuropien Kwalifaing bai salensim Ireland long Barlow Park long 29 Oktoba, 2017, long RLWC 2017 Pul resis. Ol bai salensim ol USA long Townsville Stedium long 5 Novemba, 2017 na salensim ol Fiji long Canberra Stedium long 10 Novemba, 2017.

Olgeta tiket bilong 28 gem bai kamap insait long 5-pela wik resis em nau ol i salem long RLWC2017.com.

bilong dispela yia bikos TPNG i no bungim ol mak bilong lo bilong PNGOC na ol i lukluk long stopim bihain long ol eksektiv memba na presiden i risain. Tasol, dispela bung em ol i bin skruim i go antap long narapela taim.

WTF na PNGOC i gat histori long rausim TPNG na nau, PNGOC i bihainim dispela lek mak na wantaim tok orait bilong OTU long larim na strong TPNG gavanens na menesmen long gutpela intres bilong spot.

# Pait i kirap long Kila Haoda Kap gren fainal

RAGBI lig gren fainal resis bilong ol man long Kila Haoda Kap long Pelagai viles long Aroma Kos, Sentrel, em ol i bin pinisim kwik taim long las wik Fraide apinun.

Dispela i kamap bikos pait i kirap namel long ol sapota bilong tupela tim, Aroma Coast West na Goilala Karuka.

Pait i kirap taim referi i awodim wanpela trai i go long ol Aroma Coast long 63 minit we ol pilaia bilong ol Karuka i belhat pinis long referi long dispela taim.

Dispela trai i skruim poin bilong ol Aroma Coast i go antap we skoa i sanap

olsem 18-14.

Siaman bilong Judiseri bilong Sentrel Premia Lig, David Silovo, i tok, wanpela pilai bilong Karuka i bin paitim referi, Paul Wani, bihain long em i bin awodim trai.

Bihain long dispela, olgeta sapota bilong tupela tim wantaim i ran i go insait long pilai graun na i tromoi ol stik, ston na ol narapela samting i go kam long namel long ol yet.

Ol i bin pait inap long 5-pela minit na bihain ol i wanbel gen. Planti ol papa graun long Aroma i kisim bagarap taim ol i pait.

Silovo i tok olsem judiseri

bai bung na kam bek wantaim wanpela disisen long gem bihain long tripela de.

Bipo long dispela resis em ol A gret namba tri na foa fainal namel long ol Porebada Bulldog na Vewala Pelagai we Porebada i daunim ol Vewala wantaim wanpela poin, 14-13.

Long anda-20 gren fainal resis bilong ol man i kamap pas long dispela de em ol Keleone Green i daunim Keleone Pride, 4-1.

Ol Koiari Osis i bin daunim ol Marshall Laggon Sentrel, 6-4, na i pinisim namba tri ples long anda-20 divisen.



Pait i kamap namel long ol sapota na pilaia bilong tupela tim, Aroma Coast West na Goilala Karuka, na olgeta pilai na sapota i ran i go kam long olgeta hap bilong pilai graun.

# Nupela trek bai pinis klostu taim ...Etletik PNG bai lukautin namba wan bung

NUPELA etletik trek long Kimbe, Wes Nu Briten Provins, bai pinis klostu taim. Nau ol i wok yet long ol liklik samting.

Ol i bin putim ol nupela samting antap long hap bilong ran long wik i go na nau ol bai makim lain antap long hap bilong resis.

Presiden bilong Etletik PNG, Tony Green, i bin go lukim dispela hap long las wik Mande na i tok olsem ol hap i mekim bikpela wok na dispela resis em i bikpela samting bilong Wes Nu Briten Provins.

"Em i bikpela hap bilong resis na ol i bin wokim bikpela wok wankain olsem ol i bin putim ol hap bilong resis long Pot Mosbi long taim bilong resis.

Green i bin stap long Kimbe long bung wantaim Provinsal Edministreta, Williamson Hosea, HOC na ol representativ bilong Tim Wes Nu Briten long toktok

long kamapim wanpela bung long Desemba long ol nupela feseliti i kamap.

Em i tok, ol bai givim nem long dispela bung bihain long dispela hap bilong resis na ol bai kolim San Remo Invaiteesenel.

"Dispela em i namba wan sans long statim etletik resis insait long provins na em i bikpela samting long strongim Tim Wes Nu Briten long mekim wok redi bilong PNG Germs," Green i tok.

Ol i bin skruim gem i lusim strong bilong mekim wok redi bilong resis, tasol dispela bung i gat inap strong long bringim bek amamas bilong etletik resis.

I luk olsem ol narapela tim long Niugini Ailan (NGI) Rijon bai lukim dispela bung olsem wanpela gutpela sans bilong ol tu ol yet.

Bung bai op long olgeta lain i ken go lukim, tasol ol narapela tim bai baim trenspot na ol narapela samting tu.

Wok antap long grensten em ol i wok yet na bilong kamapim dispela bung em ol i bin tok orait long yusim hap bilong resis.

Resis bai kamap insait long tripela de, 16 i go inap long 18 Desemba, we ol bai resis long olgeta iven, tasol stipel-seis, malti iven na sprint hadel bai no inap kamap.

Fomet bilong resis bai wankain long Rijonal Sempionsip program wantaim olgeta iven bilong open na anda 18 divisen na liklik namba bilong ol resis bilong anda 16 na anda 14 divisen.

Etletik PNG i stap wantaim tu long Spot PNG Faundesen long kamapim trening bilong Teknikal Opisal, we em bai kamap long Desemba 13 i go inap long Desemba 15.

Ol spotmasta, bipo etlit na ol narapela lain i gat laik long lukim dispela i ken ringim Kompetisen Menesa bilong PNG Gems, Philip Lavatu, aninit long PNG Spot Faundesen opis long Kimbe.

# PNGOC i makim Intaim Eksektiv bilong Taekwondo PNG

SPESEL Jenerel Miting long makim nupela eksektiv bilong Taekwondo PNG (TPNG) em ol i bin skruim taim Papua Niugini Olimpik Komiti (PNGOC) i tok orait long interim komiti long lukautim menesmen bilong spot long liklik taim.

Bod bilong PNGOC i tok orait long ol i bin makim John Cholai olsem Intaim Presiden bilong Taekwondo PNG, Justin Worinu olsem Seketeri na Albe Pondek olsem Tresera.

Taekwondo PNG bai stap aninit long lukaut bilong intaim eksektiv insait long 6-pela mun i go inap long 12 mun bilong Wol Taekwondo Federesen (WTF) na Osenia Taekwondo Yunion (OTU) long pinisim lo na polisi bilong ol.

Ol bai holim wanpela bung insait long pinis bilong dispela taim bihainim nupela lo bilong federesen na tu, ol bai makim nupela eksektiv.

PNGOC i rausim Taekwondo PNG long Oktoba 5

# Meri long midia i pinisim spot nius trening

**OL 16 meri ripota husat i pinisim spot nius trening i kisim setifiket long Meri long Nius na Spot trening na mentaring program long Pot Mosbi long wik i go.**

Ol i bin kamapim trening long helpim ol meri ripota long strongim wok bilong ol we ol man tasol i save wok long spot ripoting.

Australia Gavman i patnasip wantaim ABC Intenesenel Developmen i save wok long tripela hap i sapotim dispela program long givim ol skil na save bilong raitim spot nius. Na tu, long kamapim netwok wantaim ol narapela meri spot ripota, midia na spot ogenaísesen.

Long taim bilong presen-tesen, Deputi Australian Hai Komisina, Ms Bronte Moules, i toktok long raitim stori bilong ol yangpela meri na mama i save winim sampela gutpela samting aninit long spot.

“Skil yupela i kisim long dispela wik long raitim ripot, intaviu na netwok wantaim ol midia na spot ogenaísesen bai givim moa strong long wok bilong yupela na bai helpim yupela long raitim planti spot stori bilong ol meri,” Moules i tok.

“Aninit long raitim spot stori bilong ol meri long midia na aninit long ol narapela spot bilong developmen pat-



**Deputi Australian Hai Komisina, Ms Bronte Moules, i givim Meri long Nius na Spot trening setifiket i go long Heidee Waito long Yut Stesin bilong NBC, Tribe FM.**

nasip wantaim Australia na Papua Niugini, ol pikinini bai luksave olsem em i nomol long ol meri i kisim ol top posisin. Aninit long dispela rot, ol bai rispektim ol meri na bihainim ol lo. Na em i soim tu olsem em i orait long ol mama na yangpela meri long pilai spot na amamasim ol meri husat i pilai spot.”

Sophie Yarusu bilong TV WAN Nius ogenaísesen i tok olsem netwoking sait bilong dispela program i helpim ol meri long spot nius long ske- lim ol eksperiens na sapotim wanpela na narapela.

“Mi bilip olsem spot em namba wan samting long developmen sait bilong ol pipel na Meri long Nius na Spot woksop i strongim lukluk bilong mi long raitim ol spot stori na sapotim ol meri husat i pilai spot na spot edimistresen long kamap bikipela,” Yarusu i tok.

Australian Gavman i patnasip wantaim ABC Intenesenel Developmen i givim Meri long Nius na Spot program long olgeta hap long PNG na ol kantri long Indo- Pasifik rijon long 2016 i go inap long 2017.

# Sunam i winim POM hoki taitel

SUNAM Hoki Tim i winim 2016 Pot Mosbi Hoki taitel bihain long man na meri tim bilong ol i kamap wina bilong tupela divisen wantaim long las wik Sande long Sir John Guise Stediam Hoki pilai graun.

Long divisen bilong ol man em ol eksperiens tim Sunam Gold i daunim ol Bladez, 2-0, na winim taitel.

Resis i kamap strong long divisen bilong ol

meri we ol i bin givim ekstra taim bipo long ol Sunam i daunim ol strongpela birua, Bismarcks, 4-2, na i winim taitel.

Hoki Asosiesen i kisim malolo long sotpela taim long larim ol wok redi bilong FIFA Anda 20 Wol Kap resis bilong ol meri i ken kam long mak bipo long ol i mekim plen bilong tonamen bai kamap long krismas.



**Ol Sunam wantaim yelo uniform i daunim ol Bladez, 2-0.**

# Gahekava i ran gut

PORO Gahekava i ran gut long South Plains College tim bilong em long namba wan taim bilong em long resis long narapela kantri.

Gahekava i gat 23 krismas i bin stat resis taim em i gat 14 krismas long 2007 na i winim namba gol medal long 3000 mita steeplechase resis bilong ol meri.

Em i joinim tim Texas long Jenueri long dispela yia taim em i statim gen skul bilong em bihain long Pasifik Gems

Gahekave i mekim gut long 2009 na 2010 na em i stat resis gen taim em i go long Kokopo long yia 2011.

Bihain long em i bin pin-

isim Sekenderi Skul bilong em long 2013, em i bin lukluk long ol gem long Pot Mosbi. Em i bin winim silva medal long 3000 mita steeple resis na setim namba wan rekot bilong em yet. Tim poro bilong em, Rama Kumiligo, i winim gol na i setim nupela rekot.

Gahekava i resis long tupela mun i go na em kamap namba 7 ples long las wiken long Junia College Rijonal Sempionsip na setim rekot bilong em yet wantaim 19 minit 36.96 seken.

Nau em i lukluk long helpim tim bilong em long mekim gut long Nesanel Junia College Kros Kantri

Sempionsiplong El Dorado Kansas long Novemba 12.

Em bai pinisim kros kantri sisen bilong em wantaim namba wan marathon resis bilong em long NJCAA Nesanel long Alabama long Novemba 19.

Seketeri bilong Etletik PNG, Philip Rehder, i tok olsem ran long kros kantri i save givim gutpela stat long ol etlit long trek sisen na mipela i lukluk long Poro bai resis long yia i kam.

Ol poro tim etlit bilong em long South Plains College, Shirley Vunatup na Naomi Kerari, i mekim wok redi tu long indo trek sisen bai stat bihain long krismas.

# Takara Hawks winim Duban Kap long Madang

**James G. Kila i raitim**

SIAMAN bilong PNG Ragbi Futbal Lig, Sandis Tsaka, wantaim kosa bilong PNG Hunters, Michael Marum, i bin givim taim long las wik Sande long stap long Madang long lukim gren fainal bilong Madang Ragbi Lig Sevens Duban Kap.

Tsaka i tokaut olsem em i amamas tru long ol ogenaísesen bilong Duban Kap fainal na em i tok, stail na kala bilong ragbi sevens futbal i kamap gutpela moa yet long Madang.

Narapela biknem ragbi lig pilaia na pastaim kepen bilong PNG Kumuls, Paul Aiton, tu i bin go long Madang long lukim dispela gren fainal bilong Duban Kap. Aiton tu i givim tok amamas bilong em long lukim namba wan gren fainal we i kamap orait stret na soim trupela pasin bilong

spot na fea-pilai.

Kosa bilong SP PNG Hunters, Michael Marum, i tokaut olsem em i lukim pinis gem bilong sampela ol pilaia long dispela ragbi sevens na em bai kisim nem bilong ol na askim ol bihain long trening wantaim ol nesanel tim.

Minista bilong Petroleum na Eneji na Memba bilong Madang, Nixon Duban, i meja sponsa bilong dispela tonamen wantaim K43,000 long dispela fainal.

Siaman bilong PNGRFL, Sandis Tsaka, i givim bikipela tok amamas bilong em long Minista Duban, husat i tokaut long sapot long kamapim wanpela ragbi lig stedium long Madang. Em i tok dispela em bikipela samting tru long ragbi lig long Madang provins na long PNG tu.

Insait long fainal bilong Duban Kap long primia di-



**Minista bilong Petroleum na Eneji na memba bilong Madang, Nixon Duban, i putim K43, 000 long lukautim Duban Kap fainal.**

visen long Sande gren fainal em Takara Hawks i wilwilim stret Knights, 8-0, na ol meri Takara Hawks i kilim indai paia bilong Bulldogs, 4-0. Fainal bilong ol anda 20 man i lukim Royals i winim Knights.

Insait long presen-tesen, Takara Hawks husat i winim gren fainal i kisim K10,000 wantaim Duban Kap, na tim kamap namba tu, Knights, i kisim K5,000. Takara Hawks

meri tim husat i winim gren fainal i kisim K5,000 na namba tu tim Bulldogs i kisim K2,500.

MP Duban, husat i bin stap long lukim dispela gren fainal i tokaut long ol ragbi lig sapota na ol manmeri husat i bin bung long lukim fainal olsem em bai go het long sapotim ragbi lig long Madang taim em i stap olsem memba bilong distrik.



**Poro Gahekava long han sut na poro pilaia bilong em i traime resis.**



# Jonah Lomu Kap bai i kamap

**NEM na stori bilong biknem All Blacks pilaia bilong bipo, Jonah Loma bai stap laip yet long Papua Niugini bikos nau i gat Kap long nem bilong em we ol i bin lonsim long las wik Fonde long Pot Mosbi.**

Nu Silan Hai Komisen long Papua Niugini na Capital Ragbi Yunien long Pot Mosbi i bin kamapim logo long taim bilong statim Jonah Lomu Legesi Ragbi 7s Tona- men Kap long Nu Silan Hai Komisin opis long Pot Mosbi las wik.

Hai Komisina bilong Nu Silan long Papua Niugini, Tony Fautua i tok em i kirap nogut long lukim kain bikpela sapot na tok sori bilong ol Papua Niugini i kam long Nu Silan Hai Komisin long taim dai bilong Jonah Lomu i bin kamap long Novemba 18, 2015.

"Presiden bilong Capital Ragbi Yunien, Jacob Anga i bin ringim mi na em i bin laik save long wanem samt- ing NZHC i mekim long tingim dai bilong Johan Lomu long Pot Mosbi," Hai Komisina Fautua i tok.

"Mipela bin holim wanpela lotu long tingim em long PNG Ragbi Futbol Yunien hetk- wata long Pot Mosbi na ol lain i kamap i sainim wanpela

tok sori buk na long raitim wanem kain tok sori na ting- ing bilong ol long dispela man ol PNG i save laikim na husat man i mekim bikpela senis long pilai ragbi long wol na long Pasifik rijon, PNG wantaim," em i tok.

Pasin we ol PNG i soim olsem long bikpela laikim ol i gat long Jonah Lomu, em i brukim bel bilong Hai Komisina Fautua. Olsem na em i mekim tok promis olsem long taim bilong em i ritim tok sori bilong Nu Silan Hai Komisin long givim luk- save long nem bilong Lomu.

"Jonah Lomu i senisim laip bilong planti yangpela pikinini man na meri, ol yut, man na meri. Em i givim ol gutpela tingting long makim ol bikpela gol bilong ragbi laip, bihainim pasin bilong en long laikim pilai ragbi, daun pasin bilong en long givim bel bilong em long dis- pela pilai," Fautua i tok.

Em i tok olsem bikos long U20 Women Soka Wol Kap bai kamap long Pot Mosbi long dispela mun, Jonah Lomu Legacy Ragbi 7s tona- men Kap long tingim wan- yia aniveseri bilong em long dispela mun bai skruim i go long Desemba 9 i go long 11, 2016 long Pot Mosbi.

"Tasol long yia bihain na i

go, mipela bai holim dispela tonamen olgeta taim long wanpela de klostu long taim bilong em stret long indai," Mista Fautua i tok.

Em i tok, olsem meri wido bilong Jonah, Nadene na tu- pela pikinini man bilong en, Brayley na Dhyreille i kisim invitesen pinis long stap long opim tonamen.

"Mipela i wok long stretim rot bilong wanpela pastaim pilaia bilong All Black na wan pilai bilong Jonah Lomu long kam tu. Moa toktok bai kamap bihain," Mista Fau- tua i tok.

Capital Ragbi Yunien pres- iden Jacob Anga i tok, Jonah Lomu Legesi Ragbi 7s Tona- men Kap i bin kisim tok orait pinis long PNGRFU na em bai kamap wanpela tona- men long olgeta yia.

"Mipela i tok tenkyu long Nu Silan Hai Komisin long bikpela sapot bilong ol long go pas long dispela tonamen long givim luksave long wan- pela gutpela pilaia na biknem ragbi pilaia bilong dispela taim. Save bilong en, ran spit bilong en, klas bilong en, pawa na gutpela spotmen stail bi- long em long pilai graun na long personal laip bilong en ausait long pilai graun i senisim ol ragbi pilaia na ol narapela lain husat i save pilai

long ol nara- pela spot tu," Anga i tok.

Mista Anga i tok em yet bai promotim na di- velopim pilai ragbi long PNG long ol yangpela man na meri pilaim dispela pot.

"Dispela em bai kamap olsem stori tru bilong Jonah Lomu," Mista Anga i tok.

I gat 15 man na 9-pela meri tim i stap pinis long go insait long dispela namba wan Jonah Lomu Legesi Kap tonamen. I gat wanpela ples- tasol i stap bilong ol tim bi- long ol man olsem na sin- gaut i go long ol nrapela klap insait long Pot Mosbi long bringim wanpela moa tim i kam insait long bringim namba i go long 16.

Rejistresen bilong wan- pela tim em i K500. Bai i no gat prais mani bilong dispela tonamen bikos wanem mani bai kamap long dispela taim em bai i go long strongim junia ragbi.

Em i tok Billy Rapilla em i tonamen dairekta na em bai putim aut ol dro na ol ples bilong pilai insait long ol wik i kam.

Anga i tok tenkyu long midia husat i sapotim long mekim dispela taim i kamap gut.

"Ol edvetismen na pro- mosen long niuspepa na televisen, redio bai stat long dispela mun," em i tok.

Mista Anga i tok, ol i makim Ephata Samuel long lukautim olgeta wok bilong midia long toktok bilong tonamen.



## Stori bilong Jonah Lomu

Jonah Tali Lomu, i bin bon long 12 Me 1975. Em i save pilai long Nu Silan ragbi yu- nien. Em i wanpela yangpela man tru long pilai wantaim All Black taim em i bin pilai long namba wan taim ausait long kantri long 1994 taim em i bin gat 19 krismas na 45 de tasol. Lomu i bin pin- isim 63 kep na skorim 37 intenesenel trai. Em i bin kisim nem olsem namba wan trupela global supasta bilong ragbi yunien na em i kamapim bikpela senis long gem. Lomu i bin go insait long Intenesenel Ragbi Hol ov Fame long 9 Oktoba 2007, na IRB Hol ov Fame long 24 Oktoba 2011.

Lomu i brukim banis i go insait long intenesenel ragbi ples long taim 1994 Hong Kong Sevens tonamen i bin kamap. Em i kisim luksave tru long kamap wanpela top pilaia long 1995 Wol Kap long Saut Afrika, maski sapos Nu Silan i bin lus long fainal gem long Springbok. Long wanpela taim Lomu i bin kisim nem olsem 'ragbi yunien bikpela drokat', we

em i save mekim ol sapota i go bikpela moa sapos em i stap long wanpela pilai taim. Em i wanpela bilong Ragbi Wol Kap top trai skora long olgeta taim wantaim 15 trai, em rekot we em i brukim wantaim Bryan Habana bi- long Saut Afrika.

Em i pilai long planti tim in- sait long kantri, long Supa Ragbi, NPC na bihain wan- taim Magners Lig resis. Dis- pela em i karamapim Auckland Blues, Chiefs na Harricanes, na Counties Manukau, Wellington na bi- hain North Harbour and Cardiff Blues. Em i mekim kam bek gen bilong en bihain long ol i rausim wanpela kidni bilong em long 2004, inap long taim em i ritiaia long pro- fesenel ragbi long yia 2007.

Lomu i dai long 18 Novmeba, 2015 bihain long wanpela hatatek i kisim em we i bin kamap long sik bi- long kidni bilong en. Lomu i lusim meri bilong en Nadene na ol tupela pikinini man, Brayley i gat 5-pela krismas na Dhyreille i gat 6- pela krismas.



Nu Silan Hai Komisina bilong PNG Tony Fautua na Siaman bilong Sport Federation Peter Tsiamalili junia i apim bena o logo bilong dispela ragbi seven resis.



Wanpela olupela pilaia bilong PNG Pukpuk husat klostu long pilai egensim Jonah Lomu.



WHITE TUNA FLAKES  
**DIANA White**

WHITE TUNA  
insait  
**K 2.20**



Manufactured by:  
RD Tuna Canners Ltd.



*Tasty and Flavourful White Tuna for Everyone!*

# Barra i go long Hong Kong long ODI resis



Ol pilaia bilong Hebou PNG Barramundi i lainap na sanap wantaim bihain long ol i bin daunim ol Nepal long Novemba 18, 2015. Nau, Assad Vala bai go pas long ol Barras long salensim ol Hong Kong long namba tu taim bilong ol PNG long pilai long ODI resis.

OL HEBOU PNG Barramundis i lusim kantri long asde apinun na i go long Hong Kong we ol bai pilai tripela Wan De Intenesenel (ODI) resis. Dispela resis bai stat tumora, Fraide.

Ol Barras i stap long gutpela fom we ol i bin winim tripela resis long Intenesenel Kriket Kaunsil (ICC) Intekontinental Kap (ICUP) na Wol Kriket Lig Sempionsip (WCLC) raun namba 4 resis egensim ol Namibia long asples bilong ol.

Siaman bilong Seleкта bilong Kriket PNG, Daniel Faunt, i tok, stail na kala bilong ol Barras long mun i go i bin kamap namba wan tru.

“Ol i winim olgeta fomet em i namba wan samting, long wanem, kosa na tim i mekim bikipela wok.

“Win long Intenesenel Kap i givim 4-pela de kriket ekspiriens em i namba wan samting. Yumi i bowlim ol tim aut tupela taim em i bikipela samting tru long dispela fomet na mekim gut insait long 4-pela de wantaim ol wiket long olgeta bowla i kamap namba wan tru.

“Assad Vala i pilai nambawan tru na i soim betsmen bilong yumi. Betsman bilong yumi bai gro long hia wantaim dispela fomet.

“Ol win long WCLC i kamap namba wan tu. Ol i kisim kam daun ol skoa long inings we ol narapela betsmen bilong yumi olsem Sese Bau, Dogodo Bau, Lega Siaka na Vani Morea i soim kala bilong ol wankain olsem Assad Vala.

“Ol pilaia i soim kala bilong ol i soim olsem ol bai mekim gut long bihain taim,” Faunt i tok.

Dispela em i namba tu ODI resis we Barras bai pilai inap long taim ol i bin kisim ODI ples long 2014, bihain long ol i bin daunim ol Hong Kong, 2-0.

Tripela resis bai kamap tumora, Fraide 4, Sande 6 na Tunde 8 Novemba long Tin Kwong Rot Rikriesen Graun.

Ol Skwat bilong Hebou PNG Barramundis em:

- 1 Assad Vala (Kepten)
- 2 Vani Vagi Morea
- 3 Tony Ura
- 4 Lega Siaka
- 5 Sese Bau
- 6 Mahuru Dai
- 7 Dogodo Bau
- 8 John Boge Reva
- 9 Willie Gavera
- 10 Norman Vanua
- 11 Chad Soper
- 12 Alei Nao
- 13 Nosiana Pokana
- 14 Hiri Hiri

**ISUZU N-SERIES**

*the Perfect Business Partner.*